

5237.88/9519(6)

C.2

國朝閨秀正始集



國朝閨秀正始集卷二十

完顏暉 珠珍浦輯 女孫金粟保校字

顧太清

字子春漢軍人多羅貝勒奕繪側室著有子春集。按貝勒別號幻園居士工詩好學尤精內典

送居士遊盤山

欲訪招提境巉巖緩看鞭野花藏細路亂石出新  
泉鳥自雲中下僧從谷口還晚來禪院宿應遇贊  
公賢

和居士雨後過南院韻



一上女集 卷二十一  
霹靂雨蹤止崢嶸雲勢奇好風吹細麥落日在疎  
籬遠寺暮鐘動深林棲鳥遲清歌一長嘯獨立欲  
何之

秋夜

開窗對明月斂膝撫幽琴蟲語三更促西風一夜  
深寒蟬咽清露老樹抱秋心會得冷然趣高懷託  
古音

題王蒙關山蕭寺畫

霜氣淨林陬寒鴉集成樓江關楓樹老歲月畫屏

秋返照見蕭寺亂山生暮愁河閒題句好珍重墨  
林收

題陳松濤女史畫

江南江北草如烟涼在微青澹墨邊三十六陂春  
水濶柳花飛滿釣魚船

吳江秋色上漁船罾網初收夕照邊一片楓林穿  
落日最深紅處起村烟

鍾

素

字澹心浙江會稽人訓導李步瀛室。按步瀛字康皆工詩文屢試不遇尊甫。恆園先生與先舅大人爲莫逆交比夫子宦浙中以憂罷職宦况清苦往來山陰

紅香館



均主其家深感先生一家高  
誼檢舊篋得此故亟登之

庚午春日送珍浦姊北行

論交聯兩世林下接芳徽自是前緣重休言後會  
稀燕山青正遠浙水綠初肥無限臨歧意心隨帆  
影飛

張

漪 字墨花號柳塘河南祥符人訓導運  
景女諸生汪象賢室著有翠筠館集

春曉

曉起怯春寒晨光上畫欄偶來風裊裊初墜月團  
團開鏡梳雲髻依帷整素紈隔簾香暗度應是放

幽蘭

昭君

駿馬雕鞍出雁門琵琶幽怨向誰論漢宮寂寞蛾  
眉老用以和番正帝恩

高儀鳳

字秀芝漢軍人給事中鶚女○按鶚字  
蘭野別號紅樓外史乾隆乙卯進士與  
大兒麟慶同官中書為忘年交贈句有云  
終賈暫教遲侍從絲綸原不負文章真靈  
位業依然在愧我頭顱鬢已霜嘉慶甲戌  
大兒為余刻紅香館集蘭墅會製序焉

題紅香館集後

趨庭記當日大集我先吟句麗花為骨思清玉作



心紫洋浮漲遠紅島靄春深欲問生前果茫茫何

處尋主人文集中有紀夢一篇言曾夢至一處孤嶼浮海蓮花在望有人告以前生係紅香島

妙蓮菩薩前掌書侍女偶謫人間故自繪紅鳥護書圖且以紅香名館云

鮑文芸

字伴香安徽歙縣人諸生文林女弟○文芸為程生熒鏐內戚詩即生所代呈熒鏐字伯廉大兒守徽郡時府試第一尋來汴留幕中以疾送歸

題紅香館詩集後

才華誰第一香奉太夫人蜀國黃崇嘏唐宮宋若

莘江山供點染格律自清新任昉溪源水安輿好

問春

昉溪為梁太守任昉奉母行春處後人思之名曰昉溪今太守多惠政故云

翁

瑛字繡君號朝霞江蘇吳縣人主簿金堤室著有朝霞閣集海曙軒草○繡君工畫筆墨疎秀曾繪百花及白雲圖二長卷深得家南田翁筆意聞閣傳觀題咏甚夥余亦贈句辛卯秋又寄示江山雪霽圖長卷氣韻雄秀畫學益進因作古歌贈之

雲

鍾阜白雲起青天夕照暉浩渺散碧落飄飄上翠

微倚船弄秋水水涼雲欲飛雲知入岫去君行何

日歸

題自寫桐陰教子圖

崑山產良玉雕琢成圭璋我子負聰明髫年戒嬉



荒炎炎長夏日課讀桐陰旁展卷清風來開軒胸  
 膈涼繪蓮近君子虛心學修篁雲歸山自在樹遠  
 夕陽黃寸陰良可惜慨然祇自傷熊丸非奇事畫  
 荻亦尋常所難在兩子仲郢與歐陽夫子重道德  
 志每慕柴桑兒曹勤學業瑾瑜發奇光官出讀書  
 貴名由世澤長寫我劬勞意手澤兒好藏荷風與  
 竹露披圖自有香

嫁婢

六年調教漸堪觀解抱孩提解種蘭滌硯未能如

我意作羹聊可待賓餐小鬟隊裏閒言易大婦堂  
 前出語難贈汝一雙龔敵耳此行端許得平安

舟行

西風江上月明多昨夜揚帆發翠蘿高枕濤聲來  
 荻港青山無數夢中過

管

筠

字湘玉浙江錢塘人知縣陳文述  
 側室○按文述字雲伯有才名

題繡君女史百花卷子

雲裳月珮各清華斑管凝香絢彩霞知我性耽禪  
 悅慣毫端多寫妙蓮花



汪端 字允莊浙江錢塘人同知陳棐之室著有自然好學齋詩集 ○按棐之字小雲工詩即雲伯子允莊深於詩學會選前明三十家詩為初二集知人論世卓爾大家

孫節婦詩

節母程孀于孫閱六載琴瑟敦夫天亡妾無子死  
從夫生何恃墮樓不死神扶持投繯復被旁人知  
舅姑來向婦泣兩叔未娶親髮白汝夫不幸歸黃  
泉汝宜代夫盡子職舅姑言終婦淚流婦敢先死  
貽親憂良人地下姑少待此身暫為雙親留下撫  
兩叔上侍舅姑數年月照羅幃孤夫已墓木拱妾

亦淚眼枯嗟哉兩叔相繼歿舅姑心摧婦泣血所  
遭竟如此天心詎可測鬻我嫁時釵開我鏤金箱  
為翁置妾延烝嘗叔生未幾翁姑亡孤嫠弔影增  
淒涼族中鬼蜮憑陵久熒熒衰門妾獨守叔長娶  
婦婦舉男妾抱字之夫有後畫荻丸熊心力瘁兒  
年十八遊泮水兒遊泮母心喜可見舅姑夫子矣  
六十八年完節身生固非生死非死嗚呼立孤難  
死節易嬰與杵當年事處易不得迺處難請看桐  
鄉節母茹荼志巾幗鬚眉固無異



秦溝粉黛磚硯歌

涇邑某氏藏古硯澄泥也紅白青翠斑剝  
六十八 錯落若珠璣上有建業文房印余忠宣銘  
半十八 注以爲秦阿房宮溝宮人傾粉澤脂水所  
成洵異物也紀之以詩

南唐硯山不可見人間猶贖南唐硯香姜銅雀久  
銷沈幻出秦宮雲一片六國蛾眉競曉粧歌臺舞  
殿起阿房星熒明鏡驪山遠漲膩凝脂渭水香四  
圍錯落珠璣細粉暈斑斑黛痕翠臨波想見卷衣

人玉姜艷逸文馨麗深鎖長門卅六年魚膏銀海  
闕重泉御溝空照秦時月春水流花冷暮烟楚人  
一炬悲焦土留得殘磚碧苔古建業文房好護持  
鍾山小隱風流主金縷應填絕妙詞新聲曾譜恨  
來遲紅羅亭榭瑤光殿知付娥皇付保儀一行題  
跋忠宣筆昆刀細劃龍山雪早春獨殿賦梅花不  
礙廣平心似鐵何處香花識舊墩百年流轉到清  
門松烟寒滴蟾蜍淚蘭篆紅銷蜥蜴魂秦臺未到  
吹簫處秦山尙有宮人墓澄心堂紙玉管毫夜燈



還寫阿房賦

研北雜誌袁伯長藏  
有李後主玉管筆

翁大人得隙地於孤山為菊香小青兩女士

修墓並建蘭因館其上為夕陽花影樓樓

左為綠陰西閣以祀小青右為秋芳閣以

祀菊香先是為明女士楊雲友修墓於智

果寺因以耐祀遍徵海內題詠哀為蘭因

集端亦賦四律

鄭家嬌婢解吟詩和靖風流想見之遺址誤尋高

菊礪

翟晴江湖山便覽以菊  
香墓為高菊礪墓非也

前身應是謝芳姿踏

青春訪瓊姬墓

朱竹垞葉燮毛  
稚黃皆曾訪之

飛白宵題玉女碑

諸九鼎  
為墓誌

更乞茂漪書一過簪花楷法妙臨池

翁大  
人將

乞曹墨琴夫人書  
勒此詠菊香

焚餘詩草返生香遺集真應號斷腸齊國淑妃原

著姓

馮姓

蔣家小妹是同鄉

廣陵人

鏡湖桃葉鷗盟遠

女弟紫雲歸  
會稽馬髦伯

畫閣梅花鶴夢涼

屏居孤  
山別業

最憶橫波

摹小影眉樓一角寫斜陽

顧眉生會摹小青  
此詠小青

又見楊娃小印紅容華才筆麗驚鴻

容華楊盈  
川女姪

殘著錄留湖上

詩見張遂  
辰湖上編

輕薄嫵緣說意中

李笠  
翁撰



意中緣傳謝逸畫圖寒翠晚謝彬嘗摹雲友汪倫  
奇謬說也及林天素小像

潭水夜星空雲友天素嘗客汪然明春星草堂依然智果西頭路

絕勝仙霞萬點楓雲友死天素乃歸閩中此詠雲友

碧城壇坵久名家多少蛾眉禮絳紗仙子玉鑪三

澗雪美人湘管一枝花隔湖香塚秋飛蝶映水紅

樓晚噪鳴更訪吳宮雙玉墓牡丹廳畔竹陰斜翁大

人近營瓊姬紫玉墓於虎邱塔院之牡丹廳下瓊

姬闔閭女亦名勝玉又作勝玉紫玉夫差女亦名玉小

畫蘭曲題梁溪女冠韻香畫蘭長卷韻香姓王名嶽

蓮能詩文工  
小楷善畫蘭

清梵魚山夜月寒松花如雨落仙壇綺窗初試金

壺墨寫罷靈飛更畫蘭

瑤笙吹徹羽衣涼瑟瑟微波夢碧湘解為幽花寫

秋影玉人原是杜蘭香

吳氏安徽歙縣人

墨

不信灰飛後能教鐵硯穿古今無限事都付此雲

烟



熊

好字孟嫻廣西永康人巡道方受女○按方受字介茲乾隆庚戌進士以詩名與夫子同官山左最相契洽贈詩成冊又贈聯句云同心綵筆題華袞繞膝宮袍捧壽觴孟嫻其愛女也工書畫因無昆弟侍親不字以貞孝稱

二十初度

廿年歲月強支持自悔聰明得福遲秋水精神明月照青山意氣白雲知詩粗詎敢稱才女琴好誰堪作教師只苦已無慈母奉臨風淒絕淚雙垂

沈小芳

江蘇吳江人雪樵女○小芳工畫能琴

遊溪莊

去歲看梅梅已謝今春花又不多開東風埋怨梅  
花笑不是遲來便早來

景

玉字清如滿洲人舉人景瑞女弟○按景瑞字海峰與大兒麟慶同舉京兆亦工

詩清如兼工繪事

春晚偶吟

偶爾拋針線庭前緩緩行暖風吹綠草飛雨散紅  
英院落秋千影鄰家笑語聲清閒無一事誰識此

時情

陸費湘于

字季齋浙江桐鄉人侍郎墀女孫雲騎尉趙貞復繼室○按墀字丹叔乾



隆丙戌傳臚以詩名季齋詩有祖風貞復字蘇生懷才未遇之士諸孫受業師也

次兒宗侃北上作此示之

松柏生深山芝蘭在空谷不遇人採拾卽同凡草  
木男兒苟有志豈甘老茅屋貧賤人所憎富貴人  
所欲立身宜及早老大傷時促四海願爲家何必  
戀邦族文章可療貧藉以謀寸祿挾策且遨遊  
汝平生學遊子將遠行阿母愁萬斛連宵不成寐  
事事縈心曲南鄰貨疋布爲兒裁衣服燈前密密  
縫漏盡再添燭北鄰乞斗米爲兒具飢粥雖難作

餓糧且飽兒饑腹細細理行囊一一檢書篋一肩  
輕且便祇願行程速去去嗟道遠山重水更復不  
爲饑寒驅胡遽離骨肉旣憐年尙少復愁行路獨  
世故須閱歷人情多反復舉足如履冰守身如執  
玉謙和人所欽狂妄自招辱尙宜讀詩書切弗嗜  
糟麴阿母難細言兒當自勉勸到京語阿父阿母  
雙鬢禿不愁久別離愁無隔宿蓄阿兄無所事日  
取破書讀阿嫂性溫良家室稱雍睦阿妹如嫂長  
亦知慕賢淑阿恩初學步嶄然見頭角丁寧復丁



寧相向吞聲哭兒身千里行母心千里逐蚤寄萬  
金書慰我倚閨日

歲暮遣懷

風雪促歸鴉城頭起暮笳驚心聞爆竹幽意卜燈  
花貧極身偏懶愁多鬢已華連宵渾不寐怕有夢  
還家

秋色

翠袖生寒起暮愁蒼茫風景轉清幽露光月色天  
街淨蘋葉菱花水國秋蓮褪紅衣經雨浴雁排奇

字貼雲流繞籬叢菊開何晚瘦蝶吟嬾一晌留

暮春

九十韶光轉眼非小園風景倍依依流鶯無賴哢  
初曙芳草多情戀落暉紅雨一庭蝴蝶夢綠雲幾  
疊鷓鴣飛游絲亦解留春意縮住殘花不放歸

寄外

疎雨微雲落木初思鄉憶遠渺愁予倚欄數盡天  
邊雁擬獲平安一紙書

陸費思温

字玉如季齋妹沈福榮室○玉如于歸未半年而寡旋以疾卒

紅香館



白牡丹

魏紫姚黃各擅名那知別有貌傾城拂來畫檻風  
偏冷看到瑤臺月倍明本色文章原潔淨天然富  
貴不驕盈洛陽佳種誰能比相對襟期與我清

吳規臣

字飛卿江蘇金壇人

題自畫水仙

輕施淡粉寫花神色相原來總未真仙骨珊珊誰  
是伴前村深雪一枝春

陳筠湘

字琳簫江蘇長洲人諸生施君珊室

題潘星齋秀才詩稿並呈琇卿女史

領得烟霞趣高吟少俗緣清風來竹外微雪點梅  
邊詩意靜如此畫情何處傳鷗波亭子上趙管是  
神仙

秋雁

洞庭昨夜逗微霜回首天涯合斷腸瞥眼無非黃  
葉渡安身除是白雲鄉流年逝水催何速病翻西  
風怯乍涼一宿荒池菱芡密雙棲猶得傲鴛鴦  
一行秋影渡銀河又向滄江尾棹歌贈繳有人何



太急稻梁昔歲已無多忽驚葭葦花如雪正是關  
山月始波早識天南蕭瑟甚迴峰陡絕悔經過

陸韻梅

字琇卿江蘇吳縣人諸生潘會瑩室○按會瑩字星齋芝軒尚書仲子也克承家學與兄功甫弟紱庭以吟咏相尚星齋又得琇卿爲配神仙佳耦人艷稱之

蜀鏡詞

寒潭夜靜秋寂寂秋波一片洗秋色三十二字蛟  
螭蟠土花鏽遍苔花碧王家阿婦顏如花綺窗繡  
幌春雲隔傳紅寫翠承君恩瑤臺月下含霜白五  
斛螺描十樣眉芙蓉花映梅花額芳林園內悵東

風雙鸞舞罷蟾蜍蝕狎客愁聽楊柳詞宮人誰譜  
霓裳拍嘉王憂國涕橫流禹卿上書詞切直可憐  
金鑑失千秋蛾眉一笑傾人國

題女史徐比玉花卉冊

東風消息到還無應倩鷗波粉本摹留得香痕紅  
一捻半簾春影夢蘼蕪

莊盤珠

字蓮佩江蘇陽湖人舉人吳軾室著有紫薇軒集

咏晉史

鐵鎖消兵後羊車縱樂時兒癡原果報婦毒竟流



離荆棘銅駝泣風沙石虎移百年征戰裏何地不  
瘡痕

潘煥媿

字伴霞湖北羅田人知縣煥龍女兄諸生郭時潤室著有漱芳閣詩鈔○按煥龍字四梅工詩原配鄭翠蓉繼配楊琴珊俱能吟咏與姊妹唱和相得洵風雅萃於一門矣

寄綺青浣芳兩妹

料侍高堂養團圞樂不支嫂賢殊勝姊兄友可兼  
師夜月花千樹春風酒一卮憐予定相憶曾否有  
新詩

上巳小雨

山光潑翠水拖藍此日人家話養蠶柳絮桃花春  
九十雨絲風片節重三鶯藏葉底黃都溼蘭采巖  
中綠正酣天氣釀寒微送冷底身猶覺薄綿堪

小游仙

綠衣騎馬色無倫玉蕊開時艷照人天上名花多  
異種問渠何事愛紅塵

天厨肴饌自來精鳳脯麟肝玉椀盛偏是兒家甘  
淡泊只茹芝草兩三莖



萬樹仙桃結實稠園中金鎖付予收昨宵阿母殷  
勤屬莫遣東方得再偷

吐飯成蜂驚抱朴唾盤為獺說樊姑漫將狡獪矜  
奇術我亦能拋米作珠

潘煥榮

字綺青  
煥媿妹

別伴霞姊

高堂隨侍赴河陽道路迢迢戀故鄉最喜依兄花  
滿縣却憐別姊雁分行酒緣作餞心難醉人到臨  
歧話倍長此後加餐須自愛莫聽風雨憶聯牀

潘煥吉

字幼暉煥榮妹  
諸生郭元勳室

看花

小院名花鬪艷開攀花微步破蒼苔一枝折寄河

陽去付與安仁著意栽

時兄選  
海川令

楊清材

字琴珊浙江歸安人貢生知新女知州  
炳堃妹知縣潘煥龍繼室著有碧筠樓

草○按知新字拙園有才  
名炳堃字蕉甫亦工詩文

咏鵲

紅日侵晨出遠林窗前靈鵲繞枝吟勞君為我關  
情切喜事臨門早送音



李清輝

安徽阜陽人貢生春林女弟著有蕙草堂雜咏○清輝適甯生生不才家產蕩

盡乃以女紅供甘旨比翁姑歿積財數年始得營葬一女早寡又大歸相依現年六旬自課幼孫仍以刺繡餬口辛卯夏春林公車過汴清輝以繡詩相寄余哀其遇而重其才品因亟登之按春林字醇甫大兒麟慶守潁郡時所拔士也

呈珍浦太夫人

工詩何至使人窮自笑身窮詩未工錦字織成秋  
女怨葵心傾向大家風星逢明月光原小海納濁  
流量自洪附驥好期聲共遠聲聲腸斷可憐蟲

榆錢

幾陣東風過榆錢滿院投收來無處使只可買春

愁

冬日

風冷寒鴉滿樹霜清靜掩柴門魂向當年消盡如  
何又覺消魂

惜春

病體支持倚畫欄春衫袖薄怯輕寒妒花風雨魂  
消盡無數飛紅滾作團

刺繡



只理香紱不理粧金針停刺細思量而今多厭閒  
花草聊檢新詩繡錦囊

咏菊

風風雨雨又重陽籬畔花開朵朵黃到底金英真  
傲骨荒寒不改舊時妝

錢聚瀛

字斐仲號餐霞女史浙江秀水人布政使寶甫女諸生戚士元室○斐仲工畫

放言

白雲出沒山之巔中有仙客如枯禪眸子爛爛衣  
蹠蹠粲然啟齒呼我前我憎凡俗再稽首仙人隔

雲更招手呼爾來勿爾咎海邊明月難常圓仙子  
豈無塵中緣今來適爾謫數滿攜爾且住滄海邊  
充賜魚肉應厭飫藥苗芝草常新鮮人間濁酒那  
可飲何如山中一勺飛來泉荆山之鼎紫金之丹  
授爾寶訣能延年丹成服食皆神仙翻然駕鶴冲  
高天不知天闕近但覺天風寒兩行天樂遙相引  
調笙握管乘青鸞下窺塵世在何所黃雲白霧交  
漫漫下臣有一語願得上帝然不作朱門之貴客  
願作蓬萊之雲烟



懷陸費季齋表姊

重逢應有喜何事轉生悲我已愁如許君今鬢有

絲縱圖良晤久先恨別離時擬卜牆東舍終身共

咏詩

憶昔聯牀夜相攜意最慙更闌頻剪燭興到總論

文落拓誰憐我知心獨有君莫嫌書札杳操紙思

續紛

峯單

山東高密人通判可玉女給事中王璋慶室

月夜病中偶成

拚將瘦骨寒得此倦眸豁不知更有身表裏洞冰

雪

郭漱玉

字六芳號瓊泉湖南湘潭人知縣汪璨長女諸生羅喬年室著有繡珠軒稿

題閨賢畫冊

錄四

貧賤古人重富貴古人輕今人慕富貴勞勞累一

生不若老萊妻投畚無世情

右萊妻投畚

豔妝更布裙三日入庖厨此真梁鴻妻一笑偕隱

吳誰言富家女嫁易輕其夫

右孟光舉案

養姑姑無食乳姑姑無嫌點點妾心血請姑嘗苦



正女集 卷二十一  
甜翻笑元紫芝乳姪人稱賢

右唐氏乳姑

幸遇淮陰侯酬恩報千金不然一飯耳名豈到子

今男兒當自奮閨閣有知音

右漂母飯信

論詩

玉溪獺祭非偏論長吉鬼才亦妙評儂愛湘江江  
水好有波瀾處十分清

鴻纔印雪便留跡絮不能飛爲染塵偶對菱花悟  
詩境分明是我却無人

今古才人一例看端莊流麗并稱難桃花輕薄梅

花冷占盡春風是牡丹

郭潤玉

字昭華號笙愉一號壺山女士漱玉  
妹舉人李星沅室著有簪花閣稿

花朝

雨絲風片度深宵樓外烟籠柳萬條添得琉璃閣好

詩料春光一半到花朝

百花生日日遲遲恰是東風二月時蛺蝶也知春

富貴雙雙飛上海棠枝

程

啟

字意萱浙江仁和人諸生鼎女史悠楨  
室○按鼎字方雨能詩文工篆隸屢試  
不遇會客大兒麟慶幕中意萱  
其愛女也早寡無子以苦節稱



古意

蒼蒼山中柏裊裊根下蘿蘿惟柏是施固結交枝  
柯沐浴雨露久漸磨風霜多弱質附其上相期千  
載過如何中道棄勁節萎山阿已矣失所託雖生  
亦婆娑

懷家大人

有竹不能語含情誰與言洛雲山隔影江月夜臨  
軒俸薄交多厚官卑品自尊十年違定省何日奉  
晨昏

李靜華

字凝香江蘇陽湖人諸生文鈺女典史  
廖壽孫室○按文鈺字聞泉十試北闈  
屢薦未售曾為夫子司筆札繼客大兒麟  
慶幕中相依最久壽孫字禹卿為畫史廖  
裴舟子亦會  
客幕中者

虞美人

無窮幽怨對重瞳一劍酬恩楚帳中千古貞魂留  
碧草低迴猶自舞春風

王玉芬

字華雲安徽婺源人鹽運使鳳生女同  
知嚴遜繼室○按鳳生字竹嶼年逾五  
十無子華雲矢志不嫁將終身事父會竹  
嶼得子乃以禮譬喻始適嚴公子其純孝  
重可



歲暮送嚴親子役省垣

此別知非遠偏難膝下離愁過忙裏日驚見鬢邊  
絲風雪年光暮關河羽檄馳朱顏誰駐得歸計未  
應遲

自歎

回首年華去似梭思親老境苦消磨顯揚到我知  
無分珍重光陰膝下過

嚴

迢字子織浙江仁和人河道總督煨女著  
有琴餘小草○子織年甫十四工琴聰  
穎過人師事女史許孟淵講習詩  
法及操縵之學所造正未可量

夜坐

深院沉官鼓秋心到候蟲捲簾看明月人影在梧

桐

汪增安

字吉衣浙江錢塘人知縣應培女  
典史徵康女弟著有停雲小草

喜雪

紛紛密洒遍堦墀正直芸窗弄筆時莫笑才華慚  
咏絮過庭曾許與聞詩

張

藻字蘭芳浙江錢塘人巡道志鑑女縣丞  
沈本室○蘭芳早寡工書畫流寓江南  
又遭水患  
以苦節稱



月夜過高郵

千戶田廬七里城長堤如綫托蒼生共看帆楫來  
天際直覺人家住水晶兩岸漁舟頻笑語一泓烟  
月白虛清此邦都是忘機客見慣風波了不驚

查氏

號瑤溪廣西臨桂人諸生  
羅宸室著有芙蓉池館集

和霞妹

家貧端不倩人憐鎮日寥寥思悄然新闢小園閒  
種菊秋來不費買花錢

楊淑媛

字幼全福建邵武人知府兆璜女○按  
兆璜字古生與人兒麟慶同舉鄉會試

留別金華官署

幾載妝臺護碧紗無端踪跡又天涯  
明年春雨春烟裏孤負疎簾慘杏花

陳毓英

字素芳河南信陽州  
人主事雷朝恩室

桃花谿

芳草芊綿路幾叉春來兩岸盡桃花  
漁舟徑入渾無迹欲傍仙源度歲華

李如蕙

號桂泉女史  
廣東香山人

里中諸先生湖亭雅集有詩見貽并傳牋命



作即次亨齋夫子韻答之

幸叨名輩贈新詩許我騷壇領一旗彤管愧非班  
固妹絳帷欣得鄭元師湖亭即事成歌咏朽木逢  
春仰護持祇恐栽培勞化雨樛材終屬女郎姿

汪瑤芳

字若蘭安徽懷寧人布衣張偉室著有  
繡餘小草○若蘭工山水筆致蒼秀

病起述懷呈外

病後身心懶金針久不拈有才天最忌無累夢翻  
甜伴我書千卷窺人月一簾閒吟雖信口多半為  
君占

除夕感懷

誰家爆竹頻催臘顧我山厨轉禁烟且喜饑懷無  
俗累興來吟到老梅前

倩

如 山東濟寧人中  
書李大峒家婢

紀夢

孤燈欲燼夢分明雨雪聲中夜四更一縷心旌無  
著處人間天上兩愁城

對菊

心肝具有即愁根冷雨能銷怨女魂舊夢難尋秋



又老黃花仍發去年盆

唐靜嫻

號種玉田婦江蘇南匯人諸生李根室著有瀉珠閣稿○靜嫻工書所臨靈飛經為世寶重性至孝母病亟會割臂以療疾果愈

讀閨秀詩有感

靈氣入胸臆化為文與情雖曰兒女流亦令風雨  
驚謝詩何足道班史留其名苟非聖賢心才重身  
已輕多謝脂粉儔立品防譏評筆端務繁艷何以  
對太清

國朝閨秀正始集附錄

完顏暉 珠珍浦輯 女孫妙蓮保校字

趙雪華

詩見余懷板橋雜記

郟城縣旗亭題壁

不埽雙娥問碧紗誰從馬上撥琵琶驛亭空有歸  
家夢驚破啼聲是夜笳

無名氏

詩見許夔臣雕華集

錦城山店題壁

自嘆予生命不齊全家漂泊任東西早行列肆心



先恐夜宿茅簷意轉凄異地風光多冷落天涯骨  
肉倖提攜可憐怯怯閨中女漫向青山和淚題

徐淑 詩見尤侗西堂集

涿州題壁

棄子拋夫咽北風驅馳心逐曉雲空此身一死非  
難事惟戀今生魂夢通

張氏 詩見陳維崧婦人集

西溝道中

凌波卸却換宮鞋女作男妝實可嗟扶上玉鞍愁

不穩淚痕多似馬蹄沙

無名氏 詩見施璵剩圃遺集

陽明堡題壁

妾住桃花塢何由晉地過春衫漬淚溼青鏡瘦容  
多目斷重雲嶺妝留薄命歌雁門今此去青塚弔

明娥

平陽女子 詩見李錫麟山右詩存○女因順治初叛鎮姜瓖之變被掠至唐城村文

昌樓下乘兵舫睡拾炭屑題詩廟壁以柳枝自經土人埋玉村旁尋彭禹峰方伯過其地聞而哀之為作記焉



唐城村題壁

血淚春山染碧紗  
哭聲直入河東家  
樓前記取孤身死  
願作來生並蒂花

江右難婦

詩見蔣機秀名媛繡鍼

雄縣題壁

新作盤頭卸舊妝  
銀環換却小明璫  
風塵改盡當時面  
不敢逢人說故鄉

江前烈女

詩見曾燠江西詩徵○女因康熙甲寅吳逆之亂被賊掠入舟欲污之堅拒不從抵南昌江投水者再賊怒縛而瘞之沙中女罵不絕口嚼舌血噴賊面而絕

後里人吳尹迪過其地而哀之為裏沙葬躍龍岡識以碑

絕命詞

與其辱而生不如潔身死  
目斷山上雲心比江中

水

愛

玉

詩見劉大觀縹緲閣雜鈔

五里莊題壁重書義棠橋詩

霧鬢雲鬟亂曉妝  
淡雲孤月影微茫  
自憐薄命同秋草  
戎馬鞍頭困海棠

喬倩媛

詩見朱雲煥浣花濯錦集



梓州題壁

嚴君持節蜀江秋  
小小曾隨過梓州  
夜分燈前輕掠鬢  
朝來馬上薄梳頭  
慵將往事翻新調  
未便歸來賦舊樓  
最是荒村茆店夕  
誰憐弱質不禁愁

尹氏

詩見女史完顏兌花堞叢談

泗州鮑集題壁

雕鞍西去正深春  
欵欵鶯聲聽不真  
寄語故園諸女伴  
今年花柳倍愁人

月

移

詩見程哲蓉槎彞說

涿州題壁

寒雞初唱已中宵  
獨擁銀釭伴寂寥  
一月不將奩具理  
侍兒猶道黛痕嬌

淞雲

詩見董潮東臯雜鈔

春日偶吟

一樹桃花臥綠蕪  
春陰簾外雨模糊  
宵來鄉思知多少  
又向東風聽鷓鴣  
垂楊踈地綠絲齊  
繡閣無人落燕泥  
閒倚薰籠思往事  
冷香和夢過橫溪



陸娟 詩見廖景文古檀園詩話

津門旗亭題壁

津亭楊柳碧粼粼人立東風酒半酣萬點落花舟  
一葉載將春色過江南

蘇弱妹 詩見盧見會山左詩鈔

任邱題壁

風吹哀雁近關門此日重離倩女魂夢到家鄉淒  
絕處寒烟野水苧蘿邨

陳坤維 詩見厲鶚樊榭集

丁巳又九月九日厨下乏米檢元人百家詩  
付賣以供餽粥手不忍釋因賦一律

典及琴書事可知又從架上檢元詩先人手澤飄  
零盡世族生涯落魄悲此去雞林求易得他年鄴  
架借應癡亦知長別無由見珍重寒閨伴我時

梅古田 詩見袁枚隨園詩話

永安寺題壁

靈妃齊駕玉龍回留得清陰滿綠苔來歲春風一  
相待囊琴便約嬾仙來



小

卿 詩見袁枚  
隨園詩話

登大觀亭題壁 春雲樹杪見朱欄空亭啼鳥山

入楚才逢此壯觀春雲樹杪見朱欄空亭啼鳥山

花早古殿無人暮雨寒正苦浮家弔湘水那能分

淚寄長安小喬况復愁欹枕每到登臨放眼難 時

宦關右妹右  
卿臥病舟中

鶻 紅 詩見法式善  
梧門詩話

河間題壁

萬里漂零百劫哀青衣江上別家來朝雲暮雨翻

翻看一路山眉掃不開

阿母音書隔故關兒身除有夢飛還年年手濯江

邊錦不毅人閒拭淚斑

湘 霞 詩見李兆元十  
二筆舫雜錄

過華山題壁

蛾眉何事鬥嬋娟瘦到芙蓉更可憐玉女容華真

落雁教人低首過峰前

杜采芙 詩見楊得潤  
雨亭手鈔

靈寶題壁



離恨閒將問碧翁  
銀河一抹路難通  
詩囊空自書  
飛白爪印從今寄  
軟紅孤雁有情懷  
故壘落花無  
主怨東風淒涼  
旅店燈昏夜深院  
梨雲細雨濛

蕭 珣 詩見郭麐靈芬館詩話

偕女兄仲瓔遊蔣園題壁

聞說園亭屬蔣家  
今朝偶爾駐香車  
穠桃艷李漂  
零盡開到風前姊妹花

周 氏 詩見鄭芬藝蘭軒偶錄

寄外

剪燭重攜素紙看  
短書聊且報平安  
封緘幾次還  
開拆無限離情  
落筆難

蔡 氏 詩見姚椿樵寮詩話

新水店題壁和兄幼蘭韻

鎮日飛塵撲翠鈿  
黃驄無奈早春天  
認途驛堠牆  
書字餞別旗亭柳  
當鞭一線長河明  
落照四圍老  
樹鎖寒烟遣愁  
賴有填簾倡題罷  
簪花又黯然

吳興女子 詩見袁潔蠡莊詩話

春閨



繡罷頻呼姊妹看  
暖風晴日滿闌干  
花閒打散雙蝴蝶  
飛過東牆又作團

粲花女史

詩見袁潔  
蠡莊詩話

偶成

紅塵小現女郎身  
廿載空餘未了因  
燈火一檠風四壁  
可憐誰是眼中人

圭齋

詩見女史歸懋  
儀繡餘續草

燈花

深閨午夜漏聲嚴  
一穗嫣紅淑景添  
明艷不須枝

葉襯穠華何必色  
香兼影垂並蒂人  
初夢花結同心月  
半簾試問明朝何  
吉兆好將心事向  
君占

錢塘女子

詩見徐巖  
叟詩選

邯鄲客舍題壁

獨坐幽齋夜氣清  
可堪風雨作秋聲  
典釵沽酒偕君醉  
揀史燒燈快我評  
事業到頭都未是  
英雄當下只爭名  
自慚弱質非男子  
閨閣沈埋愧此生

山陰女子

詩見陶元藻  
篁村詩話

武林客舍題壁



深閨羅素不禁秋扶病來尋古寺遊看到紅葉縹緲處又添新恨上扁舟

智年生

浙江錢塘人。智生姓黃名琰為女史。顧和知女孫幼慧能詩七齡絕筆奉佛。維謹尋以童身入空門雲棲石公為祝髮改名智生年十三從容坐脫異香滿室茶毘後得舍利子二十四菴眾建塔藏之。

咏菊

簾幙暗生香奇葩勝艷粧不隨秋草委獨立傲繁

霜

咏雪

霏霏玉屑點窗紗碎碎瓊珂嚮翠華乍可庭前吟

柳絮不知何處認梅花

曇道人

字靜婉江蘇金壇人。靜婉姓吳甫字而寡守志家居父母相繼歿遭明末兵亂無以自存乃避居木瀆鎮香水溪上女真祠為女冠號曇道人以清修終後宋拔仲中丞過之題其門曰一自春風停彩仗至今月夜有丹爐蓋其地在姑蘇臺西北紅桃翠柏掩映門庭清溪一曲水有餘香相傳為西子浴處至今憑弔夷光者未嘗不及靜婉也

別思

西崦雨未收東崦風又作留住綠簑衣莫與篙師



著

神

一 字美南號龍隱江蘇華亭人著有龍隱遺草○龍隱本前明考功郎中夏允彝

女初名淑吉適嘉定侯洵年二十一而寡撫周歲孤檠後祝髮為尼法名神一明亡其翁之兄峒會及子演潔殉難允彝亦自沈宅第俱為瓦礫先是龍隱避兵結廬曹谿龍江開兩家奔命賴以棲止已而其舍岐會復以株連被逮母龔赴水死龍隱皆艤舟潛往收其屍舁置祖塋旁孤檠字武功才而天龍隱曰吾數年來三百六十骨節交付太虛更無繫戀矣至康熙壬寅卒表妹盛蘊貞為立傳

憶王菴舊遊寄再生

人生聚散本浮漚回首蒼茫感昔遊曉露未收花

力重午陰欲定鳥聲幽聞香小坐忘塵世步月清  
言掃舊愁梅影橫斜應似畫殘英滿地有誰收

再

生

字靈修江蘇長洲人著有再生遺稿○靈修姓姚名媯俞工書能文適嘉定侯演演從父峒曾殉難遂依夏淑吉於曹谿祝髮為尼改名再生

仲春十五夜大人山中言旋即別寫懷

白雲天末和愁低無限情懷怨曙雞烟柳河橋殘  
月小疎鐘古寺曉風凄百年幻影花枝老廿載浮  
生草路迷一葦江頭如可折竺乾西去待相攜

靜

維

號寄笠道人江蘇華亭人著有寄笠遺稿○靜維姓盛名蘊貞字嘉定侯峒會



寄兒

三子澣未嫁而澣以亡命死靜維著懷湘賦見志卒歸上谷本為夏淑吉表妹旋斷髮禮夏為師與侯演室姚侯潔室龔同止曹谿所謂東園歲寒亭也

一自雙親杳鄉園不忍旋七年三見面稚子漸齊

肩夢斷燕山月春歸海樹烟書來能念我三復鶴

鴿篇

贈聖幢師

自是閨中秀超然遠物華心能同水月骨自帶烟霞翠長真如竹黃開般若花寄言劉鐵磨應識趙

州茶

靜

照字月士順天宛平人○月士姓曹本前明宮人李闖犯京城月士隨內監劉南

奔乙酉後削髮為尼著宮詞百首

宮詞 錄二

閱遍司農水旱書君王減饒復齋居御厨阿監新

承旨來日羹湯不進魚

儉德慈恩近古稀他方織錦盡停機赭黃御服重

經澣內直才人著布衣

性道人

字羽步號飛卿江蘇吳江人著有比玉新聲集○羽步姓周名瓊適士人陷國



園中因走避江北  
為女冠號性道人

春居

小榻參差竹影斜  
衡門芳草鎖烟霞  
稜錚傲骨詩為友  
澹泊禪心畫作家  
暖日不須來燕子  
春風爭肯逐桃花  
憑闌細雨瀟瀟夜  
慷慨悲歌撫鎬鉞

留別吳蕊仙

一身飄泊御風遊  
物外閒閒水上鷗  
錦字怕隨江雁斷  
詩魂時逐碧雲流  
野塘孤棹黃花晚  
香谷寒窗雜樹秋  
只恐重來仙路迥  
烟迷霧阻武陵舟

寄懷范洛仙

黯淡銷魂獨倚樓  
登山臨水又逢秋  
簷前垂柳絲千尺  
只繫柔腸不繫舟

上

鑒

字蕊仙號佛眉江蘇長洲人著有香谷  
焚餘草佛眉新舊詩○蕊仙姓吳名琪  
適諸生管勳能文章精繪事尤好韜畧周  
羽步贈詩有嶺上白雲朝入畫樽前紅燭  
夜談兵句管生死遭家難遂為尼法名上  
鑒慕錢塘山水乃與方外友周羽步為六  
橋三竺之遊西泠  
名媛爭欲識之

送別

雪意滿芳洲  
屏山引去舟  
霜風醒客夢  
笳月起邊



愁萬里從軍急孤身倚劔遊家園落日裏莫上最高樓

感懷

煮鶴焚琴事已賒不堪回首數年華愁來有句留殘葉夢去無人問落花鳥惜晚香窺鏡檻婢憐新病鎖窗紗柳枝剩有蘇臺曲未審春風憶若耶

邨居

貧家風物厭鉛華波影浮來盡落霞夢裏青山閒歲月鏡中人面悟空花秋鐙病後惟餘研春水愁

多未浣紗枕上片魂誰喚起夕陽烟樹幾歸鴉

智圓

字湛然江蘇常熟人○湛然姓殷

弔彭娥

娥南通州人夫貧甚謂彭鬻乳以活彭不從自經死

乍可饑寒死彭娥節苦貞將雛憐燕羽逐婦惡鳩

聲智以窮愁短身因激烈輕寸膚如可鬻涇渭不

分明

德日

字冰心號藥林江蘇泰州人著有拂愁集○冰心姓蔣名葵幼慧讀書過目不忘于歸陳氏所適非偶削髮為尼法名德日

初秋



蕭然一葉下梧桐初覺涼生小院風暑氣漸消人意爽臥看新月到簾櫳

德月 字玉潔號雪巒德日妹○玉潔名蕙遭家難與姊同入空門法名德月

和姊韻

小院涼生落葉風天街玉露溼花叢懷君淚筆難題句瘦減腰圍總病中

靜諾 浙江仁和人○靜諾姓林嘗卓錫河渚結茆為廬每至萬樹梅花千灣荻雪自謂此中有真悟處

真悟處

春宵卽事

野藤花氣暗隨風狼藉春光大半空斜向石闌頻

徙倚一庭明月有無中

悟源 字寂居江蘇婁縣人○寂居姓王工書善屬文本儒士女幼孤育於益壽庵老尼法名悟源與張紫繫李婉兮相友善以清修終

婉兮相友善以清修終

書懷柬紫繫女史

花鈿翠袖久蠲除經案繩牀意自如性懶已忘驕

慢習家貧猶惜舊藏書談空有弟窮禪理適興從

親學蠹魚更喜蕭疎塵慮少草衣木食足安居

無垢 字石香江蘇通州人著有茹蕙集○石香姓陳名潔適同里孫生孫多內寵以



石香無子不相得遂大歸尋為尼法名無  
堃即以其祖舊業所謂鴻寶堂者事焚修

閨怨

青翠入簾櫳永日駐幽閣愁繁芳草生靜覺桐花  
落奩鏡網蠟蛸庭柯巢烏鵲夢去不關愁晚來心  
自惡獨坐只書空微雨益蕭索

悟

情字石蓮江蘇丹徒人○石蓮姓翁幼孤  
無依隨姊入都姊為前尚書和公琳侍  
姬和歿姊殉石蓮南歸主女史駱佩香家  
趙歐北聞其才會贈七古一首載集中佩  
香繼歿石蓮祝髮  
為尼法名悟情

感懷

清淨而今徧六根焚香幸作佛前人已知性海須  
登岸且向恆河試問津口藏誰傳彌勒法心燈自  
照女兒身癡情一點消難盡吟到詩篇忘苦辛  
蒼茫回首萬緣空慢說平生塞與通眼見公侯興  
敗易命憐姊妹死生同只留此日袈裟在不見當  
年錦繡叢坐徹蒲團波浪息心緣穩渡片帆風

柳

是

字如是號蘼蕪浙江嘉興人尚書錢謙  
益側室著有戊寅集○按謙益字牧齋  
有才名如是本姓楊名隱柳蓋其寓姓也  
性機警而志豪宕有俠烈風初慕陳臥子  
名欲依以終身乃持女弟帖往訪臥子弗  
納始適錢牧齋號河東君順治乙酉五月



力勸死難收齋不能乃自奮身投池水中  
急救得甦後遭家變竟以身殉人稱晚節  
故朱以載題其小像詩云蕤蕤脈脈柳柳疎  
疎想見文君放誕初誰識秋風搖落後獨  
將一死報尙  
書蓋傷之也

春日我聞室作呈主人

裁紅暈碧淚漫漫南國春來正薄寒此處柳花如  
夢裏向來烟月是愁端畫堂消息何人曉翠帳容  
顏獨自看珍重君家蘭桂室東風取次一憑闌

遊西湖

垂楊小院繡簾東鶯閣殘枝蝶趁風最是西冷寒

食路桃花得氣美人中

王

嫩字修微號草衣道人江蘇江都人許譽卿側室著有遠遊草○修微工寫山水花卉筆墨超妙初隸樂籍往來西湖遊遊楚粵揮灑輒以千金繼參憨山大師於五乳歸心禪悅偶經吳門爲俗子所窘乃歸許相依兵燹間誓死相從

重過雨花臺望江

春姿靜東岑雲影結遙燦坐覺高臺空不知翠微  
半落花自古今嘯鳥變昏旦撫化良易遷卽事聊  
成玩况乃晴江開綠波正拍岸

湖上次韻答黃夫人



去住湖邊別有緣門前紅葉滿來船劉綱夫婦霞  
為骨謝韞家庭雪作篇翠袖風前誰薄醉黃楊樹  
底與參禪迴思飄渺伊人跡只隔鴛鴦南浦烟

山齋坐月呈主人

月上桐陰薄閒階夜氣清與君到曉坐幽思自然

生

薛素素

字潤孃浙江嘉興人○素素工寫蘭竹  
兼精走彈初隸樂籍色藝冠一時尋謝

客借女史李龕山黃皆令結  
鄰西湖之濱以書畫相娛

西湖晴泛

處處笙歌夜月年年花柳春風刺史經今多少風

流只說蘇公

李香

字香君江蘇上元人副榜侯方域側室  
籍與侯生有終身約時明福王僭號南京

阮大鍼當國欲羅致侯生香君力諫止不  
與通嗣侯生客史閣部幕下香君獨守權  
黨田仰聞其名以重金邀致香君辭不往  
強之乃毀容以自全會福王選伎梨園大  
索入宮香君托病堅不承應明亡卒歸侯  
生以終今壯悔堂集有李姬傳云亭山  
人孔尚任又為演桃花扇傳奇以表之

題女史盧允貞寒江曉泛圖

瑟瑟西風淨遠天江山如畫鏡中懸不知何處烟



波叟日出呼兒泛釣船

卜玉京

江蘇上元人。玉京原名賽工琴善書

中人初隸樂籍居虎邱後歸秦淮順治乙

酉南京城破改道人裝吳梅村祭酒曾作

聽女道士卜玉京彈琴歌贈之尋下髮號

玉京道人因為俗子所竄乃依良醫鄭保

御築別館自居持戒律甚嚴刺舌血書法

華經以報保御又十餘年卒葬惠山祇陀

庵錦樹林

李題自畫小幅

沙鷗同住水雲鄉不記荷花幾度香頗怪麻姑太

多事猶知人世有滄桑

董

白

字小宛號青蓮女史江蘇如臯人徵士

水繪園小宛本樂籍女天姿巧慧針神曲

聖食譜茶經莫不精曉少長慕吳門山水

徙居半塘咏詩鼓琴杜門謝客尋歸辟疆

為側室居艷月樓中鑒賞鼎彝書畫相處

九年而卒辟疆作影梅庵憶語悼之小宛

會哀集古今閨幃軼事為一書名曰奩艷

王西樵朱鳥逸史往往津逮焉辟疆又有

二侍姬一蔡含字女羅生而胎素工大幅

山水曾為墨鳳圖題咏甚多一金珥字圓

玉工花卉畫有貼瓣梅花便面余曾見之

係先寫枝梗其花乃拾落梅瓣隨意粘貼

巧慧絕倫上有蘭士題云不須殺粉替傳

神却把真身作幻身為問幾生修得到落

花剛遇散花人水繪園林蔓草荒恰教留

得樹頭香紅窗小試拈花手想見

纖纖指爪長錄之以誌一時風雅



綠窗偶成

病眼看花愁思深  
幽窗獨坐弄瑤琴  
黃鸝亦似知人意  
柳外時時送好音

衛融香

字紺雪江蘇長洲人韋子甫側室著有紺雪詩卓○融香初隸樂籍與韋子甫有終身之約韋索米他去融香不負初心身歷險阻訪得之後子甫歿融香雉經以殉詳載于文瀟拾薢錄

午日

強向庭闈聚尊前  
醉碧觴心隨人共遠  
愁與日俱長  
燕引雛歸幕榴含子笑  
房寸衷多恨事  
蘭芷弔

三湘

蔡

閏字小秋山西代州人一等子趙宏燮側室○小秋本青樓女與趙公子有終身之約會追父命從軍匆遽言別小秋即杜門謝客越九年趙自軍中歸親訪之納為側室生子某官知州

送別

銀燈燄短金壘歇  
欲語離情舌若結  
今夜蕭蕭一陣霜  
來朝馬上看黃葉

湘雲

遺其姓陝西長安人中書關敏側室○湘雲解音律能詩父本名諸生後流落風塵居盤豆驛北門前即玉孃湖明流秀嶂竹樹蒼鬱風流自賞遇關舍人遂委身



馮關沒杜門守志三十餘年乃終

感懷

塗朱暈碧寫春光  
弄草拈花益自傷  
爨下焦桐簷際竹  
人間那有蔡中郎

荷花

濯濯紅衣在水濱  
閒花野草不為鄰  
縱然生在污泥裏  
細看原無一點塵

高

鳳字碧枝山東歷城人都司許柱臣室  
○碧枝初隸樂籍後悔之從許生許以戰功顯高竟受封

題桃花

妾面如桃花妾命如桃葉  
寄語再來人莫道春三月

月

韓巫雲

四川華陽人○巫雲工小楷善歌舞初隸樂籍名重一時尋自悔風塵委身一士會病卒乃削髮為尼更名幻雲以清修終

鈴兒草

眾芳燦爛獨青青  
賺得明皇仔細聽  
寄語流鶯今且去  
春風繫遍護花鈴

陸月香

江蘇上元人知縣那斯輝側室○按那斯輝字嘯崖月香本秦淮妓居丁字簾



前色藝冠時尋悔之與嘯  
崖唱和相得遂委身焉

送嘯崖赴揚州

送郎赴揚州留妾金陵住郎夢江南來妾夢江北  
去

乙意蘭

山東歷城人知縣袁潔側室○按潔字  
玉堂有才名意蘭本樂籍能文工製像  
生花卉玉堂以事戍邊意蘭欲從行其母  
尼之意蘭製駢體文以陳情乃策蹇就道  
追玉堂至隴西及之因格於例留寓關內  
三載以待其歸玉堂為繪策蹇圖一時名  
士題咏  
成帙

自製剪綵雙雞贈主人

何妨雌伏忽雄飛裁剪雙雞寓意微有志四方男  
子事要郎早日策征騑

婷

婷朝鮮國公主○康熙間檢討孫致彌陪  
使朝鮮手編采風錄載有婷婷公主遊  
暑詩而未及此作華亭徐振撰朝鮮竹枝  
詞四十首其一云紅粉清才妙一時摩訶  
雜句寫烏絲朱鬢碧瓦深如海吟遍婷婷  
公主詩則公主之儒雅温文益可想見

送春

韶光春九十別去覺匆匆宮柳搓深綠園桃散碎  
紅數番榆莢雨幾陣棟花風小立增惆悵相期隔  
歲逢



古寺尋花

春深古寺燕飛飛深院重門客到稀我正尋花花  
盡落尋花還為惜花歸

李淑媛

號玉峰主人朝鮮人學士趙瑗側室遭亂死節

斑竹怨

二妃昔追帝南奔湘水間有淚寄湘竹至今湘竹

斑雲深九疑廟日落蒼梧山餘恨在江水滔滔去

不還

海月

朝鮮人俞汝舟室

貧女吟

夜久織未休戛戛鳴寒機機中一疋練終作阿誰

衣

許景樊

字蘭雪朝鮮人進士金成立室○按蘭雪兩兄筠筠皆舉朝鮮狀元官宏文館

學士蘭雪七歲能詩雅擅才華而不見答於金及金死難蘭雪乃為女冠守志以終

朝鮮人重之又嘗作廣寒宮玉樓上梁文流傳中國尤何作朝鮮竹枝詞有最憶飛

瓊女道士上梁會到廣寒宮句錢塘陸次雲繹史紀餘謂蘭雪才名與謝家道韞蘇

家小妹鼎足非虛譽也

古別離



工女集 附錄  
麟麟雙車輪一日千萬轉同心不同車別離時屢  
變車輪尙有跡相思獨不見

感遇

盈盈窗下蘭枝葉何芬芳西風一夕起零落悲秋  
霜秀色總消歇清香終不死感物傷我心流涕沾  
衣袂

湘絃曲

薰花泣露湘江曲點點秋烟天外綠水府涼波龍  
夜吟蠻娘輕曼璫瓏玉離鸞別鳳隔蒼梧雨氣侵

江迷曉珠神絃聲徹石苔冷雲鬟霧鬢嗁江姝瑤  
空星漢高超忽羽蓋金支五雲沒門外漁郎唱竹  
枝銀潭半掛相思月

次伯兄高原望高臺韻

層臺一柱壓嵯峩西北浮雲接塞多鐵峽霸圖龍  
已去穆陵秋色雁初過山迴大陸吞三郡水割平  
原納九河萬里登臨日將暮醉憑青嶂獨悲歌

宮詞

絳羅襖裏建溪茶侍女封緘結綵花斜插紫泥書



丁女身 附錄  
敕字內官分送五侯家

綠羅帷幄紫羅茵香麝霏微暗襲人明日賞花留

玉輦地衣簾額一時新

玉輦地衣簾額一時新  
綠羅帷幄紫羅茵香麝霏微暗襲人明日賞花留  
玉輦地衣簾額一時新  
綠羅帷幄紫羅茵香麝霏微暗襲人明日賞花留

國朝閨秀正始集補遺

完顏暉 珠珍浦輯 女孫妙蓮保校字

顧若璞

字和知浙江錢塘人諸生黃煒母著有  
臥月軒稿○和知為前明貢生黃茂梧  
室早寡奉姑教子以清節稱學裕經濟著  
作等身尤好講河漕屯田邊備諸大政巾

幃中奇人也

國初諸老宿皆極推重余久欲覓臥月軒集

而不可得今秋金生守椿始以此二詩相

質適大兒麟慶又檢呈鍾仰山少宰姚伯

昂詹事瑞芸卿學士戚蓉臺洗馬吳巢松

侍講劉芙初姚笙華劉陸堂三太史姚餘

菴給諫蔣雲簪銓曹岳中峰水部桂一山  
宗滌樓二舍人車珊濤內史文心薌冠軍  
劉松嵐王藝齋二觀察吳蘭雪刺史蔡桂  
山司馬何棟士馮菽橋周宣史熊聽淥袁



素珊汪香浦六大令楊雨亭范紫嵐二州  
倅鄭鴻亭都官夏朗齋張魯岩二廣文張  
雨田孝廉唐海瓢潘星齋二秀才及張生  
溟四姪爾濟先後寄贈各作余因補輯此  
卷而彙載采訪姓氏以誌一時之盛時  
辛卯八月既望紅香館老人珍浦又記

秋日為兩兒修讀書船泊斷橋作

聞道和熊阿母賢翻來選勝斷橋邊  
亭亭古樹流疎月漾漾輕鳧泛碧烟  
且自獨居楊子宅任他遙指米家船  
高風還憶浮梅檻短燭長吟理舊瑣

暮雨

澗草依依浮玉隄楊拂拂迷烟江  
上蒲帆欲沒村

中桑女爭還

姚氏

浙江上虞人徵士黃宗羲母○氏為前  
明黃忠端公尊素室子三長宗羲字梨

洲次宗會字澤望季宗炎字晦木均諸生  
講學不仕初忠端公因劾魏忠賢客氏下  
獄死崇禎時梨洲年十九草疏訟冤袖鉄  
椎椎逆黨許顯純拔崔應元鬚時以忠義  
孤兒勿問歸遊劉蕺山先生門福王監國  
阮大鍼秉政復被逮明亡脫歸奉母以老  
康熙閒薦舉鴻博辭不就試  
詔取所著書宣付史館

咏扇

世閒物性初無定百鍊鋼成繞指柔  
何似蕉蒲經織後能將九夏變三秋



何氏 山東蓬萊人貢生吳甯甫母○氏爲前明吳如諍室年十八嫁五月而寡欲以身殉舅姑勉以保護遺腹子始進食尋生甯甫課讀成立順治中邑人公舉節孝

述志

精衛銜枯石期填滄海流松柏抱貞心苦節勵嚴  
秋父有指腹婚歸期偕白頭結褵未浹歲駕言燕  
薊遊中道逢虎呶白骨委荒邱哭之星斗變訴之  
鬼神愁願邀雙日月爲照心悠悠

衛琴娘 浙江天台人○順治三年兵亂被擄抗節不屈潛逃至甘露寺楊公祠以炭書

二絕并小敘於壁遂斃祠下事載丹徒縣志

甘露寺題壁

衣片鞋幫半委泥千辛萬苦有誰知幾回僻處低  
頭看獨自傷心獨自啼  
目斷天台旅雁長青山綠水杳茫茫不知憔悴中  
途死魂夢何時返故鄉

柳依依 字靈和江蘇江都人方墳室○靈和寓居姑蘇順治乙酉兵亂被擄抗節不屈絕粒七日而殞吳人重之建祠虎邱袁子才隨園詩話指爲虬仙蓋未徵實也

渡江

一葉扁舟萬里程五銖衣重白雲輕三秋會飲銀



河水嚶向蛟龍不敢行

莊氏

江蘇武進人舉人侯曦祖母以節 賜

旌 按氏為前明進士侯鼎鈺母侯進士出黃忠端公道周之門順治初奉母隱居屢徵不起閱歲母卒乃奉遺詩請忠端公夫人蔡氏玉卿為銘蔡夫人因手書成卷題詩誌感並綴一序其詩曰淳懿發至性冰潔勵松筠如何遭薄祜中道折良人晝哭哭無盡瑤草沒青春况乃秉端操儉勤素所遵子讀母夜作無忘夕與晨諄諄惟爾誨恐不克負薪事翁復至孝含德振彝倫教兒繼祖業不敢尚逡巡無愧昔鄒母三遷擇比鄰履仁道所貴服節豈終屯孫既列賢籍子亦負簪纓一門荷榮顯流澤布徽聲猶驚墜前緒兢業保令名慚余負四教得配君子庭豈期遭板蕩王室倏以崩夫志炳日月苦節終以貞萬里歸孤

臨終遺詩

櫛碧血灑鍾陵捐軀事則已豈顧兒女情  
撫茲四孤孽羅列未成行况無擔石積寧  
保立與成深負泉下人不得俱死生感傷  
五內裂涕泣淚縱橫慚讀貞烈詩彤管播  
芳馨不愧表旌節婦式照汗青至  
今石刻藏金陵侯氏合並記之

憶余遠嚴慈十六締家室舉案倣齊眉相莊友琴

瑟屈指甫十春昊天降酷烈摧我連理枝折我雙

飛翼號天天無光哭日日無色聲咽不成啼淚盡

繼以血漿粥不染屑寸腸痛碎裂誓死三尺繩微

軀奚足恤睠顧膝下孩難割此雛孽更思腹中兒



抱血不忍擲余母滄交頤勸予姑進食因以偷餘  
生課兒任厥責長兒歲八齡腹兒僅濡沫寸壤望  
喬嵩疇年幾成立呼兒夜讀書篝燈事剪尺中夜  
每悲啼蟲聲答唧唧兒或荒於嬉童心玩歲月雖  
愛能勿勞提誨敢姑息操杖薄責之未下余手怯  
懼負九原人又憐兒啼泣踟躕涕漣而擲杖淚流  
臆翁也憐孤兒以祖代父職諄諄踰蒙師每自坐  
師席翁又殞大星悲腸倍百結雀牙外侮來榛棘  
世途仄黽勉督吾兒焚膏繼祖業乙卯倖邀天兒

名廁賢籍豈不破愁顏歡中帶慘戚父也苦埋頭  
未展雲中翮孺子席其餘父又弗能覲撫此泥金  
書霑淚幌巾溼呼兒立庭中訓以父遺德父行勵  
皎霜父襟霽白日雖云給舍兒寒素乃厥實初余  
歸爾家規余謝綺飾父唯知讀書余亦唯衽織閉  
戶寡見聞幾不辨菽麥口不言錢刀言之頰亦赤  
蹙蹙行道中塗人罔有識檢身如處娃恂如慎口  
舌古樸羞逕趨偃庭無履跡入室儼大賓燕居屏  
狎客天性惡繁華布袍數浣滌不獵豪俠名不蹈



貴兒轍不隨世態羶不因家勢熱笑彼齷齪者胡  
爲戰蝸國立志奮鷗鵬餘人盡驚鴨趨步慕聖賢  
矢志恥苟得或以阿堵歆髮指怒沖幘或以尺牘  
干手裂紙飛陌陌豈謂我性柔乃以腐鼠嚇我固童  
子鴻不愧父清白卽之則溫良犯之仍巖嶮括囊  
慎有餘干霄氣莫遏義交恆澹如不爲嘖嘖密一  
二道誼朋締好比膠漆蓼水有徐君筆硯相晨夕  
共披忠烈書拍案叫快絕相對評古今達旦夜不  
席其性煦于春其腸勁于鐵立志邁千秋傷哉甲

道折小子奚有能父慶所流溢勉矣毋忽忘鏤鉢  
父遺則兒乃倖速飛薄種小有獲公車踰十年偷  
蔭耽遊逸青雲阻半途九原心愈惻兒雖已眉鬚  
命跪爲兒述兒時戲以嬉父唯勤以飭兒時近狹  
邪父絕平康迹兒時披綺羅父衣唯毛褐兒時饜  
肥甘父唯呷菹汁兒時娛管絃父未曉笙笛兒嬉  
荒歲時父讀忘冰雪兒館塵封几父館晝下鐫父  
耕子乃畚天眼從古碧兒顧自滿盈竟爾忘先澤  
非余覬冠帔責兒如此急慮兒壯志灰懼兒中道



正女集 卷之六  
六  
跌黃泉望欲穿待兒賁幽蹟能無涕滂沱爲兒絮  
言說丁丑倖春闈仰藉先人烈況出黃師門山斗  
幸不逃寄柬馳長安茲售良可悅余愧未同歸已  
蒙荷旌節父行多隱潛仰乞如椽筆吾爲一開顏  
得慰素願畢忽聞除齊安未免衷違迫正處驚愕  
時曦孫報蘭茁俯仰四十年悲歡判今昔然余懼  
盛盈微天太耀赫一子拖綬紳一壻先袍笏雛孫  
髮覆眉叨榮復烏奕月滿防其虧日中憂其昃兒  
曹來吾前婦媳喚俱集旣已勒兒箴亦思勤婦式

勿以泥沙侈勿以晏安溺勿以珠玉誇勿以簧舌  
惑常思富可貧貴亦可賤易夜月理機絲朝暎就  
盥櫛知余晚向榮不知早茹藥如何口捋茶遺茲  
田與宅如何歷險巖屈茲脫岑寂哭夫哭次兒順  
少恆多拂哭翁哭母姑喜一愁恆百榮枯倏忽移  
衰盛古今驛男行祈全瑜婦職無圭缺長此交相  
成內外各努力毋學世途儂吾自安吾拙蒼天不  
負人施償理自直余語不厭多聊以代砭石止此  
不更言祈早歸同穴聚首可千年少補存亡隔曷



願海籌添曷畏夜臺黑合掌叩蓮臺真性勞收拾  
撒手卽歸家笑與兒孫別此詩藏匣中留俟他年  
刻

林玉衡

字似荆福建福清人布衣茂之妹倪廷相室○按茂之字古度以詩名似荆天資穎悟年七歲承母王美君教解吟詠會建小樓落成值雪後月命之作應聲賦此

樓成口占

梅花雪月本三清雪白梅香月更明夜半忽登樓  
上望不知何處是瑤京

孟坤元

字順成甘肅清水人舉人何學海室

滕王閣

憑高直瞰大江浮弔古還登帝子樓千載文章傳  
絕調一時雅燕盡名流落霞孤鶩齊飛晚遠水長  
天一色秋誰道閨中胸次窄也將詩筆紀清遊

徐元象

字奇傳湖北廣濟人舉人張楚偉室○奇傳詩文有雋才其京口寄父書王漁

洋尙書

亟賞之

送外

送君入楚江悠悠歸路長一去隔千里魂夢伴瀟

湘



謝玉娘 廣東揭陽人諸生陳藝衡室

春暮

半砌苔痕細雨侵金猊香盡冷鴛衾夢魂不向花  
閒去畏聽春鶻一夜吟

計氏 江蘇上海人諸生張永皓室

中饋辭

織紵之餘庖厨有俶酒漿遵豆膳飲饘粥烹飪必  
親勤率婢僕衣食之原艱難用最淡泊安分所以  
養福

陳端敬 字玉田江蘇常熟人諸生韓騏室尚書對祖母誥贈一品太夫人

讀內則

降德始閨門細大無不備首表盥漱儀其次及歛  
食推之養老夏末後學女事羅羅數百言著力苦  
無地不知孝與敬一篇三致意開卷求其端掩卷  
得其義父母與舅姑卽此可承志

吳氏 浙江德清人贊善沈三曾室編修樹本母著有花萼軒集○按三曾字允斌康熙丙辰進士樹本字輪翁康熙壬辰榜眼均有文名

詩牌集字卽咏



韋家紗幔鎮長垂  
縹几親裁集字詩  
穿就明珠光  
有耀緝成碎錦跡  
難窺堂前才士思  
韜筆階下諸  
兒強綴詞何事  
謝庭誇散朗  
因風隻句枉稱奇

汪氏

漢軍人學士覺羅逢泰總督覺羅滿保  
繼母 誥封一品太夫人以節 賜旌

○氏年二十二而寡家貧甚撫前室子三  
親課經史逢泰滿保俱成進士康熙五十  
九年八旗博訪貞節氏以受封例不與  
特旨旌表藍鹿洲太守為作汪太君傳

院署偶成

清晨坐聽鼓三搗  
庭院深深靜不譁  
禮罷佛香簾  
半捲篆烟一縷繞  
窗紗

花含英

浙江仙居人  
張源長室

秋柳

瘦腰愁黛鎮堪憐  
幾見垂絲冷暮烟  
秋雨樓中誰  
弄笛夕陽庭外剩  
鳴蟬黃花無恙辭  
官日白首關心種  
樹年一片離情秋  
黯淡何須重問畫  
橋邊

嚴宗光

字餐霞浙  
江長興人

題媳潘本温桐韻詩  
刪夢花小草卷後

春花秋月共平章  
剪燭西窗擊鉢忙  
婦德女工常  
自抑最煩心處是  
羹湯



姚霞齡

浙江仁和人孫懋觀室著有晚雲樓遺稿

病起

幾日荒園未得遊  
偶來草徑綠猶稠  
鐘聲遠近烟中寺  
樹色微茫雨外樓  
臥病心情仍帶懶  
殘春天氣正多愁  
畫梁燕語渾無緒  
故向檐前絮不休

陸么鳳

浙江錢塘人

秋閨思

晚來疎雨過人頭  
風靜羅衣颺不休  
漫拾亂紅題小字  
暗驚新句又悲秋

湖烟漠漠晚棲鴉  
自掃楓香坐煮茶  
一帶芙蓉寒映水  
那知愁思屬兒家

楊

芬

字瑤季江蘇長洲人御史沈懋華室著有瑤華集

鴛鴦

春暖池塘烟草齊  
彩毛初浴淨無泥  
眠沙聊借莎為褥  
戲水還將浪作梯  
繡出羅衣相對舞  
織成錦帳一雙棲  
芰荷香處深深隱  
一任虞羅障碧溪

鍾若玉

字元圃江蘇長洲人周官室元圃工寫墨梅書法蒼古

月夜



西窗遲月上風細暗香浮夜靜留花砌更殘冷翠樓離懷憑去雁扶病又經秋暗訴長隄柳天涯縮別愁

郭

瑛字景曹浙江富春人進士王礪松室

雜咏

偶於清曉捲珠簾好放雙飛燕出簷忘却此身原是客又收山色入詩奩

袁

氏浙江錢塘人知縣袁枚姑母

責郭巨

孝子虛傳郭巨名承歡不辨重和輕無端枉殺嬌兒命有食徒傷老母情伯道沈宗因縛樹樂羊罷相為嘗羹忍心自古遭嚴譴天賜黃金事不平

沈

氏浙江桐鄉人姚濂聘室以節烈賜旌

○氏年二十婚期已定而濂卒父母知其志不可奪送之往遂留夫家伴靈終三年喪立繼子營葬畢作詩自剄不殊復吞針如故夜夢其夫曰汝當效夷齊耳遂絕粒卒時康熙五十六年丙申夏日也

絕命詩

少小曾翻烈女篇敢將心跡擬前賢只知從一而終義一命追隨到九泉



伊禮哈

佟雅氏字芬若滿洲人雲麾使文麟室

贈上方山老尼

早悟無生理常依元鶴宮壺中綿歲月世外飽霜  
風玉版參來熟金針度更工春山閒采藥不讓李  
騰空

林

璵

字自芳福建侯官人謝廷詔室以節賜旌著有自芳偶存稿

遊李氏山齋

鍵戶浮過七十年偶同女伴陟山巔景當勝處堪  
娛老心到清時可悟禪曲榭花多迷窄徑層岩石

瘦嗜流泉莫非米氏留奇筆描出烟光別有天

張似誼

字鸞賓安徽桐城人大學士謚文和廷玉女主事姚文燕室著有保艾閣詩鈔

月夜憶外

霜風月影透窗紗香冷金猊燭吐花料得寒侵孤  
客枕相思應有夢歸家

歸

湘

字溶溶江蘇常熟人

春日邨居

竹翠沙平迥絕塵澄江荇暖鴨知春門前車馬應  
嫌僻鏡裏鶯花不笑貧幾陣疎風開柳絮一番瘦



雨淨苔茵年來種得桃千樹偷放仙源學避秦

姚益鱗 字竹筠號繡巖浙江烏程人嚴兆蓀室著有吟香樓草

宮詞

中官宣詔按新箏玉指輕彈別恨聲恰被東風吹  
散去君王乍聽未分明

任婉 字靜宜江蘇江都人諸生王子莊室

初春即事

篆靄湘簾潤波光曲抱楹山雲含雨氣林鳥變春  
聲茗熟琴心古花香蝶夢清半窗風動處松子落

棋枰

宋頷珍 江蘇揚州人御史王樹芳側室○頷珍能詩工篆書與嫡鄭蘊英多倡和作

七夕詞

挑完錦字夜風賒穿罷金針月影斜再拜雙星非  
乞巧來生莫作後庭花

江瑞芝 字天香甘肅靜寧州人舉人劉伯鷗祖母著有蟬鳴小草

老龍頭弔古 長城至此入海

長城雄峙海東頭可奈秦封二世休山色未消前  
代恨潮聲猶帶舊時愁三千白骨何年瘞萬里征



魂此地收獨有孟姜墳上草青青不沒自常秋

吳

淑字伴梅浙江錢塘人汪碧園室○伴梅為女史陸若筠女曾輯其母詩集倩衍聖公孔傳鐸序而傳之

酬碧園

涼生羅袖入新秋燈下微吟火欲流窗外無端風雨過懷人江上起離愁

沈琳仙

浙江歸安人編修樹木女諸生吳丹峰室

漢宮秋

誰家佳卉屬劉家爛漫空教物有華金屋夜沉宮

盡草雁門人去漢無花虞兮解舞愁如結桃葉能

歌興已賒往事不堪秋色裏漫攜紈扇近窗紗

莫兆椿

字蘭芳江西南昌人通判吳興宗室著有蘭芳閣淑性編

贈蘇夫人

譜系彭城舊看山壺範新不緣門地貴早識性情

真柳絮吟風暖椒花筆露勻香閨遲驛使紙帳獨

愁人

登吳山贈淡菴女鍊師

探奇忽向最高峰客裏遊仙覓道蹤菊徑秋開金



鎖鑰花臺雲捧玉芙蓉地緣人傑新芝秀路隔天  
梯斷谷封物外相逢真不易山深遙聽暮林鐘

張玉貞 廣西柳城人趙得珍室  
玉貞早寡以清節稱

倦繡

花氣濃薰鏡檻竹風涼度疎簾情長錦瑟絃斷繡  
倦金針倒拈

題海烈婦祠 祠額曰香  
閨鐵漢

艷質從來利女貞狂且何故擾冰清可憐一死成  
千古留得香閨鐵漢名

王瑾 字潤如江蘇江寧人以節  
賜旌著有味蘗居稿

對竹

萬个琅玕晝色昏便無風雨也銷魂生成竹是妻  
凉命只替人間染淚痕

馮儀 字如蘭山東益都  
人諸生陳師錫室

登晴川閣

佛閣岩堯景物妍疏梅香透竹籬邊萬家烟火山  
連郭一派江濤水接天葉葉風帆交極浦層層雲  
樹隱晴川登臨竟日憑欄處草木多情亦可憐



袁

倩

字蝶仙江蘇長洲人顧益齋側室著有蝶仙遺草

曉起遣興

半牀初睡足抱日倚簾斜鵲占巢爭樹蜂馱蕊開  
衙山光分野墅春色到鄰家心事憑誰語銜杯細  
啜茶

汪

璫

字催翁浙江烏程人國子監助教徐以坤室著有修竹吾廬詩草

嘲柳

却笑陶彭澤空傳五柳名看他風過處腰折善逢  
迎

彭玉嵌

浙江海鹽人陸烜室○玉嵌工琴

秋夜寄遠

真向山陰道上遊日歸何日詠刀頭吳歌聽徹烟  
江月楚簟涼生水閣秋岫縣東迴難著屐刻溪南  
下不通舟尺書未寄寒衣薄莫眺天邊風露樓

鍾文淑

字學姑安徽舒城人諸生張同工室編修萬年知縣慶昌母

垂釣

鷗自忘機水自流掉來小艇一竿投羽沈最喜纔  
啣餌綸掣何妨慣脫鈎雙槳夕陽紅蓼岸片帆明



月白蘋洲等閒收拾簑衣去把酒高歌傲五侯

鍾文貞

字睿姑文淑妹貢生吳綱室○睿姑工琴

蝴蝶花

不向花間晒粉衣偏從花裏鬪芳菲誰云祝女裙  
邊幻豈入莊生夢裡飛曲逕烟濃春欲晚南園風  
暖綠初肥香心素艷渾無那好借滕王妙筆揮

遊冶父山

樹裏湖光一鏡開水精宮外有樓臺散花不到維  
摩室親捧雲珠供佛來

徐

錦

字珠村浙江秀水人朱辰應室○珠村好讀理學書中年玩易手書卷尾云吉凶消長常相倚伏故君子順受其正

益松

檻外窗前聊自安於今誰作棟梁看任他挫折凌  
霄志勁節依然傲歲寒

鄭渾冰

字水心福建閩縣人林楚麓室著有繡餘吟草○水心工律賦有集典麗可誦

閨花朝

曾牽鈴索護蒼苔為算佳辰又一回香國更傳消  
息到芳叢仍送暖風來醉搗羯鼓春剛半笑折花



枝信已催看取女姨生日再換紅轉綠約重開

遊仙紀夢

曾步瑤臺宴玉京排空歌罷奏鸞笙飛瓊脉脉頻  
相囑莫向人閒漏姓名

王桂蟾

字綠雲順天大興人

題千墨菴重摹七姬志石刻

何年玉骨委雲根屈指娉婷倩女魂青鳥啼殘香  
欲燼金蓮栽罷火猶温仙姿此夕歸坏土貞性當  
時報主恩碑蝕苔深留古蹟令人憑弔憶吳門

汪氏 湖南善化人

送父之粵東

驅歌纔唱惹新愁况復西風雁叫秋鬢白未輸兒  
女債年豐猶作稻梁謀關河迢遞人經慣寒暑隄  
防老更稠瘴雨蠻烟非樂土叮嚀早自覓歸舟

孔淑成

字叔凝山東曲阜人博士廣籙女著有學靜軒草

侍母點消寒圖

堂上傳呼停繡襦慈萱看比掌中珠鶴眠積雪三  
三徑猩點消寒九九圖月影清如今夜好梅花香



似去年無眼前索笑隨昂妹博得歡顏韻不孤

黃楨 字雅宜浙江仁和人州同袁龍文室

燈花

銀缸奪月吐光華影入窗櫺透碧紗未忍輕挑私

問汝不知何喜報吾家

吳蕙 字香宜江蘇上元人知府袁樹側室

春晴

細雨連宵溼軟塵今朝晴放一窗春柳絲低舞花  
添笑都似風前得意人

孟楷 號淑端內史山東鄒縣人

贈黃雅宜吳香宜二女史

誦君佳句愛君才未對菱花卷已開想是瑤池曾

結伴詩仙逃下一雙來

梁符瑞 字紫瑛福建長樂人太常寺卿上國女知縣龔豐穀室著有崑輝閣稿

白菊

滿園佳菊占秋光恰好黃花學素粧三徑月明初  
見影一籬霜重但聞香清冷倍稱高人座淡泊如  
標晚節芳欲問瑤華開遍未水晶簾隙尙微茫



梁蓉由

字韵書符瑞妹教諭許濂室著有影香窗詩鈔韵書姊妹為女史許鸞案女同承慈教均以詩名韵書工琴善畫尤善填詞

秋夜步月見銀河

晚空蒼茫弄寒碧疎簾未捲蟾蜍入捲簾望月見  
銀河白練橫空幾千尺一泓澄澈涵天秋銀雲無  
聲作水流月波一片流不盡泛泛長在東西頭花  
陰滿地波紋起幽人立在秋江裏不知銀漢幾何  
深夜夜傾來一庭水鵲橋邊風露寒長河悠夜  
俱漫漫誰家窗外霜砧急催得銀河落曉山

杏山道中

營壘消除殺氣清行人日暮自心驚雲行萬里龍  
蛇陣風戰千山草木兵壯士天河曾洗甲將軍麟  
閣已題名祇餘白草荒原上無限精靈對月明

高麗墩懷古同蓮叔夫子車中聯句

殘墩歷閱幾滄桑蓮長使行人弔夕陽一路青山

皆拱北蓉千秋白馬尙來王唐皇血戰唯留殿蓮

箕廟明禋有薦薌此日郵程次第數蓉他時清夢

繞高岡蓮



范氏 浙江嘉興人。○氏家貧甚。又撰痼疾蕭索無聊。惟以吟詠自遣。紅顏薄命。悲夫。

紀夢

昨夜幽窗夢依稀  
轉故鄉篆烟浮  
曲檻竹影照迴廊  
寂寞人無跡  
朦朧月有光  
蘭閨仍似昔  
覺後倍淒涼

書懷

修行有力超生死  
煉性無方制病魔  
剪燭愛吟團扇句  
焚香時詠莫愁歌  
紅塵綺麗關情少  
翠嶂烟霞入夢多  
夙孽傳身思懺悔  
虔心常救撲燈蛾

俞桂 字璠英浙江仁和人

無題

纔唱驪歌日漸曛  
牽裳官道淚紛紛  
紅英陌上花無主  
錦翼雲中雁斷羣  
玉鏡幾時還照影  
金爐從此罷燒薰  
聞知天上無離別  
願得相攜駐白雲

方芬 字采芝順天大興人知縣維翰女著有紅蕊山房學吟稿

阻風敬步伯父原韻 十一歲作

大風徹夜舞狂漪  
正是扁舟繫纜時  
兩岸霜楓縈遠夢  
一帆寒雨亂鄉思  
江閒白浪青山動  
天外黃



雲畫角吹寄語石尤須早息揚舫穩渡莫教遲

大風讀杜少陵詩

為愛新晴展卷宜小窗細讀少陵詩分明國史同

家乘一洗人閒月露辭

劉蘭雪 廣東南海人

無主元宵即事

簾外相傳問阿誰女郎攜撰踏燈詞星辰錯落西

涼府日月交臨太乙祠蘭麝暗烘花氣早笙歌響

遏漏聲遲香車冉冉遊何極暫把新詩付雪兒

慶 字吉媛蒙古人貢生札史女孫副都統德奎室○按札史字彬如篤於內行乾隆三年八旗公舉孝友

特旨賜六品頂帶以旌之

春日偶吟

深深庭院靜無譁細雨和烟溼杏花且喜閉門塵

事少二南讀罷誦南華

衛氏 湖北漢陽人知府鄒貽詩室知縣堯廷母

雨中度嶺

嵐光看不定回首失斜暉莫辨峰千疊唯餘綠四

圍雲流山欲動風急樹如飛絕嶺人家少籃輿何



處歸

秋夜感懷

白雲遙望自縱橫  
粵水吳山意獨縈  
生女原知終  
外向思親那禁悵  
中情鳴蛩入戶秋  
能語落葉敲  
門夢屢驚鄉思  
離懷拋未得  
小窗愁對短燈檠

凌瑞珠

浙江歸安人○瑞珠年十二卽有詩名

石溪亭

小桃齊放舊梢青  
婉孌遙嵐做翠屏  
約畧百花潭  
畔見畫樓紅影落谿亭

江墨莊

安徽安慶人巡道臬女諸生左湛涵室

失鶴

誤信林泉得所依  
難甘雌伏又雄飛  
纔銜花去啄  
岩石不其月來窺  
釣磯塵世何方非  
借境海天有  
路忽懷歸超然未受樊籠苦  
慎勿輕投朱戶扉

江鴻禎

福建福州人著有焚餘存稿○鴻禎年七歲卽能鼓琴九歲工詩年十五夢紫

衣女六七人招之遊謂曰爾與吾皆閩風侍女也爾其歸乎醒以告母牽衣而泣乃索平日所作詩焚之日不可留爲人世口實援琴彈一曲不成聲曰人琴俱亡矣遂推琴而起尋卒其舅氏陳登龍詩人也憐其才檢焚餘所存敘而傳之



王右軍書曹娥碑榻本歌

古來奇節誰卓越曹家女兒擅名烈捐軀殉父赴  
長流石破天驚此奇絕上虞江頭風倒吹靈旗掠  
抑寒鴉飛邯鄲意匠洵巧妙黃絹幼婦銘豐碑烏  
衣公子王逸少晉代才人兼墨妙黃庭神仙樂毅  
忠書法于人有深肖細書此本尤精微筆筆鋒神  
見孝思直將格地通天意幻作簪花倒薤奇

寄兄

膝下長居好依依惜遠行身隨征雁去愁逐晚潮

生岸瀾雲山寂江空夜月明更深不成寐應念倚  
閨情

方彥珍

字靜雲號岫君江蘇儀徵人諸生程立  
基室著有有誠堂稿。女文選亦能詩

荆軻

壯士今何在蕭蕭易水寒悲歌虹貫日怒氣髮衝  
冠力為知交盡軀因生劫殘重泉何所恨獨恨誤  
燕丹

秋泛

回文體

淼淼波平岸深懷感暮秋擾雲紅樹密翻浪白鷗



浮鳥巧啼幽竹花踈放遠洲小航灣僻渡蘋藻簇  
舟游

張瑾英 浙江歸安人

題蕭山汪氏雙節詩後

拂鬱情懷各自知中衰門戶共支持寒裳對月縫  
來澀香稻春芒炊得遲一母先酬歸室志廿年偕  
續柏舟詩同行同願前無古彤管新編女士規

王如圭 字麗則江蘇婁縣人

題秋江觀濤圖

一舸爭流出秋江五兩風濤驚聲似駑客信氣如  
虹匹練微茫外層巒縹緲中蓬瀛知不遠日照海

門東

顧文琴 字徽則江蘇華亭人王丕曾室

歸途風雨

浪打風吹破寂寥暮雲變隼水天遙舟人不省歸  
心急猶自停橈候晚潮

虞惠芬 字玉如江蘇金壇人同知鄭士杰室著有竹月山房詩鈔。按士杰字薇軒與

大兒麟慶同舉進士出蔡申甫學士之門



京口舟次

森森烟波濶桃花著雨芬檣聲搖客夢帆影挂春

雲北固橫青靄西津澹夕曛清風何處落孤磬月

中聞

孫玉樹

字芝香順天大興人庶吉士濟南知縣潤姪女

黃鶴樓

高詠誰能接上頭憑虛覽盡古今秋雨峰雲氣連

三楚萬里江聲聚一樓書到瓊都須借鶴歌聽玉

笛欲呼鷗遙思滿目芳洲路觀此應拋去國愁

袁

妯

字小芬浙江錢塘人知縣史璜室著有靈簫閣詩選○小芬為子才太史女孫

詩布家學

春雨

點點霑衣溼絲絲繞檻斜綠勻將鬪草紅潤待簪

花遠岫疊朝靄前村明斷霞幾家茅舍下相賞話

桑麻

夜坐納涼

碧天雲淨露華濃閒坐迎涼小院中移榻愛教身

近月卷簾還欲面當風蕉圍曲檻千重綠鐙閃高



樓一點紅謝却塵氛添逸興誰家橫筵度遙空

吳仲嫻

字澹香浙江仁和人鴻臚寺序班明義女諸生聞銘室

讀熊澹仙女史詩話

茗椀香爐伴晝吟清詞麗句獨研尋名花過眼須

珍惜費盡閨中鎖日心

虞山女史

姓氏無攷。余曾見一使面繪五色蝴蝶神采栩栩後書此詩細膩熨貼

手錄存之嗣吳甄甫太史示以代訪詩筒內亦有此云係歸佩珊作合並誌以備攷

五色蝴蝶

青陽初轉見來稀忽訝林閒一葉飛拾翠暗翻遊

女袖采藍新染侍兒衣春疇花細銜鬢瘦瑣闥苔

深側翅肥香徑未迷河畔草尋芳時見柳梢歸

黃金散盡菜花稀猶傍芳畦貼貼飛村裏來時分

菜色枝頭捎去誤金衣穿從香徑魂俱定舞入秋

林體不肥勝似蜜房諸伴侶經營花事不曾歸

赤欄杆外見依稀誰剪朝霞片片飛堦藥枝頭酣

曉夢火榴花底燄侵衣自饒香艷胭脂溼不愛青

酸梅子肥一抹紅妝芳草路夕陽影裏逐塵歸

白粉牆低風信稀趁晴時見一痕飛亂飄柳絮難



尋跡細舞梨花不觸衣夢裏仙姝全縞素眼前公  
子笑輕肥南園草綠香塵暖紈扇頻搖晚未歸  
黑甜鄉裏世情稀栩栩誰教兩翅飛入夢真看園  
是漆探花偏仗鐵為衣沙堤影拂烏紗貴妝閣香  
憐鴉鬢肥欲繼元嬰親潑墨為君寫照早言歸

石

巖 浙江仁和人○石巖姓蔣工  
琴初為鉅室侍姬後人空門

題達摩像

折葦江流疾似帆九年枯坐向寒巖靜中悟得言  
詮妄笑把如來大藏緘

宋景衛

江蘇長洲人諸生程樹聘室以節 賜  
旌○景衛幼穎異喜治經年十二字程

生會生以哭大父殤景衛請於父素服歸  
程行廟見禮時舅之父方在殯成功服於  
柩前又易齊衰於姑之柩前然後哭拜夫  
柩變服成禮三年畢逮事舅十餘年立姪  
光欽為後光欽夭又立光鑑初舅既喪其  
夫兄貧不克葬景衛積財三十年始反葬  
舅姑於祖墓別葬夫於吳門乾隆三十一  
年公舉請旌時有姜貞女桂重其志自作  
柏舟圖賦詩贈之又有二婢一衛喜字於  
張張死不再字一陳壽嫁朱年二十而寡  
無子皆依景衛以老云辛卯秋九姚山長  
春木示二詩余歎觀止即取以殿斯集焉

正俗歌為陳媛作

有序

陳媛名淑睿字于林未及行而婿殤居頃



之有請昏者遂自經死余高其義又聞其  
為前明檢討五經先生繼之裔作詩美之  
禮義廉恥四維立綱常名教萬古植無愧於口無  
愧身無愧於身尤汲汲婦人再醮知身污若乃未  
昏心每惑一身那可容二心心失誰云身不失卓  
哉陳媛毓名聞五經先生蘭芽茁習禮明詩幼字  
林桃夭未賦所天卒烈女不肯更二夫相從地下  
尋靈匹見者哀號聞者悲大吏上言采訪實旌門  
表墓佇恩榮文人詩歌盛紉帙嗟予抱璞稱未亡

傳聞益覺心悽惻閒嘗讀書考五經管窺易象參  
彖翼男女睽而其志通已字未娶可推測坤道含  
章利永貞從一而終恆其德苦節悔亡不節嗟安  
節之亨甘節吉人心道心辨尚書精一微危中允  
執動罔不凶德二三終始唯一臻厥極忠貞世篤  
緬家聲無忝爾祖躬自飭詩經三復柏舟篇髭彼  
兩髦我儀特斯人去也矢靡它勿匿初心矢靡慝  
在室自誓首其姜聖人取為後世則郝鄒諸儒聞  
說殷郝仲輿鄒肇毓死同穴而穀異室柏舟齊女  
俱云其姜未嫁



中壘編在至城門衛赴急保母請還置罔聞竟入  
 持喪衰衛國凡未適人許嫁矣春秋經傳標特筆  
 僖公九年書伯姬何休公羊洞經術字而笄之待  
 成人繫屬於人養貞一明與未字之女殊原貞援  
 引曝書集朱竹垞為高蔣氏作原貞引以為論女而不歸貞為行盲  
 左穀梁弗沿襲其姬比例聖所褒堯峰南昉說堪  
 憶彭既庭女字于計未昏列節汪堯峰作志以許共姜比例彭南昉為吳孝貞志銘即踵之  
 嫁纓為禮記文名以行媒遂相識兩家齋戒告鬼  
 神壹與終身不改草娶有吉日未成昏夫死亦如

壻弔泣女服斬衰往夫門未嫁服同已娶式婦人  
 不二斬謂何天不二耳儀禮悉可服可往明可從  
 愛人以德休姑息舉世昧經謂過中此旨不明道  
 幾熄人求盡倫安能過五倫祇恐常不及由來夫  
 婦比君臣策名亦有未受職清風孤竹師夷齊商  
 朝未祿周恥食推觀子弟事父兄豈必一一親顏  
 色父子繼絕或背生兄弟前後或南北追思孝友  
 自性成非緣見面乃盡力朋從尙友及神交寧須  
 把臂投膠漆揆此可知婦與夫性真相感當循率



殷情何必同衾幃問名已定羞羞忒當知勉義非  
溺情身潔心安理亦得幼從父母最初言初命是  
遵戒私暱不悖於理曰無違許嫁之語由親出弗  
虧其體弗辱親立志不渝貴在必奪則隨亡不奪  
存志不可奪命則畢愧存不若無愧亡幾希人禽  
謹出入守貞殉烈易地同一心不二絕矯飾卓哉  
陳媛大節章浩然正氣兩閒塞傷悲自署望門寡  
門在望矣未許卽旣云寡矣難再雙茲言至正非  
偏刻鵠甘獨宿歌三年鵠告雙飛媒一逼遂將性

命付輕綃僅留心事傳遺墨視死如歸豈博名舍  
生取義寧圖逸唯媛家學五經明察於倫理昭作  
述天經地義古今垂永永幽光爭皎日

修身盡倫歌示諸姊妹

立天之道陰與陽立地之道柔與剛立人之道仁  
與義人參天地維綱常曰人自是兼男女女豈非  
人甘自阻寧唯男子希聖賢賢媛聖女有徒侶五  
官同具官則思五常同秉常獨知三從應亦悖三  
物四德由來張四維從父從夫及從子謂從大道



莫背此從茲不辱理無違步趨德行藝而已功在  
宜家德潤身言關名教謹笑顰容貌端莊非艷麗  
禮義廉恥當遵循正用其情是率性善養其氣是  
立命惡欲更有甚死生偷彊祇因殊肆敬人心道  
心辨危微克念罔念分是非精思弗奪立其大良  
知用致審其幾守身慎獨唯求是彼君子女顰女  
士無愧於影無愧衾庶免小人同受誓太上立德  
次言功不朽當其男子同莫云女子無所事德功  
言在人倫中夫主如君原不異男忠女節曷有二

繫纓結帨心齊堅處變安常身等致愛媳愛女等  
愛兒義方尤賴母兼師前遺旁出并抱嗣一視同  
仁方盡慈母耶父耶孝姑舅嫂婦諸姑信朋友同  
堂娣姒女弟兄妾婢視臣如足手爲女爲媳爲母  
妻平生閱歷涂毋迷自欺自畫皆暴棄徽音在昔  
宜思齊窮通壽夭任彼遇特立毋隨流俗誤內則  
中饋事女紅不願乎外行我素雖然苦樂由它人  
樂可自尋苦勿瞋天爵良貴何曾賤日新富有何  
憂貧人生百年那能久外物奉身竟何有自來列



女至今存德立名垂真不朽具備功言洵美才才  
華根本德生來有節無才便是德有才無節誠堪  
哀德爲主也才爲輔允矣能文亦能武貌非所重  
隨賦形崇德踐形須法古以書相證克儉勤何妨  
識字能詩文國風半屬婦人作傳經續史章令聞  
詩文闡理鄙雕琢作字甚敬卽是學德發爲才著  
德容超出庸凡迥卓犖世羨女佛與女仙姑尼孰  
箇知真詮空障淨塵唯遏欲入道豈必談元禪聖  
人不過人倫至察於人倫大賢示五官盡職備五

常三才參贊體易始巽爲風兮長女乎兌爲澤兮  
少女呼離明中女乾坤照女亦宜爲君子儒是人  
豈肯居人後出見紛華遂爾謬奉盈一覆水難收  
尙其無愧於屋漏無形之刑每在懷斯人斯可謂  
之佳善信充實乃爲美西方美人庶得儕愼終保  
始起迄止制外養中表符裏妨微處處銘盤盂避  
嫌刻刻嚴瓜李嗟予未嫁稱未亡靡它靡隱師其  
美節大饑小伊川訓廣平鐵石爲心腸若夫所處  
無不幸端宜中正而主靜蒙以養之自幼嬰少成



習慣時加省女子須教本考亭明白論語及孝經  
 推之女戒并家範定性好學先人型夜氣凜凜且  
 晝格幾希人禽恆勉助諸艱歷試久鍊金織塵難  
 染無瑕玉貞以得一清寧侔閑邪敬直女德修仁  
 可成而義可守天合剛而地合柔主一無適聖賢  
 志天地之道物不貳日月有光崇效天山川有恆  
 卑法地

正始集題詞

濟州許瓊鶴 芝仙

風雅誰提唱而今得主持人思依絳帳儂請寫烏  
 絲直可論千古無由贊一詞遙知班謝侶爭欲觀  
 新詩

金 吳縣翁 吳 繡君

體效葩經品物和關雖取次到江沱太平寰宇紅  
 窗下一二百年來逸韻多

不櫛清才半作塵和風涵煦谷生春數行小傳詩



千首蒲柳都成不朽身

名在門牆弟子員幾時問字立花前宣文紗幔傳  
經後更乞楞嚴一指禪

接都門潘虛白大姊書稱近得洛中 麟太

夫人書將選刻閨秀詩題為正始集索余

近作并囑為題詞作此應命即以代簡

楊 澹音  
室 婁縣王韞徽

閨閣敦風教大雅須扶輪輯集名正始取法貴清  
真二南首三百德化能新民時物國風紀承平雅

頌陳靜好御琴瑟勤慎采藻蘋樛木逮下歌雞鳴  
戒旦申肥泉思永歎柏舟悼悲辛亥樂具至性觀  
感知所遵吾鄉有淑媛佳儷匹王臣憶昔居京國  
翰墨相貽頻名畫本家傳新詩更無倫才兼德且  
備慧多福駢臻謝庭森蘭玉瑤環盡珠珍一別各  
天涯廿載阻音塵京華有同調寄書述前因令子  
成觀察金章貴榮身板輿奉太君同賞洛陽春平  
反添喜色封鮒助賢聲紗幔宣文座詞翰承歡情  
選詩及閨秀玉尺操權衡珠璣見錯落錦繡出縱



橫紛紛旗幟張儷白妃青并騷壇如椽筆月日有  
定評繁余才本拙出語無人驚徒羨陽春曲村笛  
慚瑤笙薄宦客津沽折腰感淵明嗟無三徑宅未  
得賦歸耕鸞鏡悲忽破血淚終年傾一棺寄梵宇  
窀穸何時成十口羈異鄉迢遙阻歸程雲泥判同  
列風雨懷前盟晝荻課遺孤切望能成名悲歌聊  
見志非敢以詩鳴

滿洲景 玉 清如

刻楮三年得趣深揚風扞雅領元音一枝班管干

秋業直是刪詩夫子心

珍浦太夫人近選正始集拙作亦蒙采入並

索 先母頌琴樓遺稿心感之餘賦此呈

謝

吳 吳江許 珠 孟淵

南征一賦播芳譽文選樓歸彤管書慚愧名同才

思減閨中空慕蘭相如

劬勞母氏閱衰門一卷遺詩半淚痕肯采陶嬰黃

鵠句人間地下各銜恩



麟見亭廉訪太夫人 憚太君選閨秀詩劉

松嵐師以拙藁薦譬鹽車之困馬欣逢伯

樂爨下之焦桐幸遇中郎實為平生奇遇

也

汪祥符張漪墨花室

江山佳處鍾靈秀吳會英才有婦人 畢秋帆尚書刻吳會英才

集孫淵如觀察夫人詩亦在選中 每憶吟壇推作手亦容巾幗與

扶輪經霜自惜如枯草向日何當受古春收入網

羅誠有幸紫薇星照氣嶙峋

已丑春初知 麟太夫人選刻閨秀正始集

乞得稿本焚香拜讀敬題三十韻以誌欣

慕時維二月二十八日值 太夫人花甲

初周謹奉詞盟沐三薰以獻

鄭室 天台陳自修

靈秀鍾閨閣鴻篇獨校讐剛詩歸正始定論合春

秋

母本江南望才空冀北儔妝臺磨古鏡繡館襲香

甌 太夫人為甌香館南田先生後裔花戲綵迎

并翎毛深得家法名詩稿曰紅香故云 紅香館



仙佩吹簫結宦遊甘棠襄化理曙暉先生歷守温州泰安二郡有

政聲太夫人實贊成之苦菜荷神庥令子登瀛閣文名著鳳

樓攀轅傳練浦握節奠黃流見亭觀察年十九舉進士由中書游遷

中允出守徽穎二郡擢開歸河道觀察去遍錫

羣黎福咸歌百祿迺熊皆夙訓翼燕本貽謀德

葆仁慈質情舒翰墨柔通經惟讓伏輯籙竟追劉

太夫人又擬仿劉向列女傳體例采輯家乘干

古賢媛列女遺事為一書名曰蘭閨寶錄言富儒編二曲搜太夫人會序關中李二曲先生集并暉遜庵先生語錄付梓

蓮花參妙悟貝葉記清修太夫人會夢捧書海島侍妙蓮大士故繪紅

島護書小照又會序憨山藥劑君臣用花栽姊妹

大師觀楞伽記重梓之太夫人心存利濟自制再造丸救苦膏正氣

稠散安坤丹等藥靈效異常又性喜栽花所居常滿

還將閨友集竟向藝林投舊什奩中索新篇日

下求芳名都入選麗句盡傳郵問字來才媛閨秀

太夫人名寄書徵文到海陬集中所選各省俱備

執贄者甚夥並有朝鮮閨秀四人

丹黃憑一管彩翠奪雙眸就體分工拙因人定去

留頌椒詞仿晉畫荻教宗歐割愛除花藥維風杜

莫愁雅音參正變才調黜輕浮直以金針度都教

鐵網收長評申月旦小敘紀風輜絳帳羅紅粉青



山頌白頭還丹年問鶴進酒杖扶鳩妾本天台女  
吟添海屋籌題詞兼祝嘏五福備箕疇

麟見亭先生官吾郡太守多惠政甲申九月

調任潁川郡人士繪練浦攀轅圖贈行去

之日奉 太夫人板輿路經巖鎮香筵祖

餞民歌賢母諸女伴邀余登樓遙送今已

七年矣聞將選閨秀正始集徵詩到徽謹

賦二章以誌欣幸

歙縣鮑文芸 伴香

練浦攀轅繪作圖爭言太守近時無義方有訓欽  
賢母曾向樓頭望板輿

才仰宣文不可留徵詩恰又到山陬吾鄉多少吟  
椒女幸得題名入選樓

漢軍高儀鳳 秀芝

才調然脂與擷芳 三集均 閨閣作 詩人一例費平章而今

織出天孫手雲錦星珠煥七襄

史 室 仁和程 啟 意萱

紅香端合繼甌香畫稿詩篇早擅場直以禮宗垂



訓誠還將餘事選詞章璇璣譜有金針度雲錦才  
憑玉尺量名士如林齊下拜一時閨閣被輝光

清室大興黃兆蘭景木

詩學

熙朝雅頌尊歌絃化被及閨門元音正始探源本  
剛盡風雲月露言

爭傳彤管筆生花錦織蘇家賦謝家莫謂無才方  
是德名姝自古擅詞華

選樓高建動吟哦賦茗人來著作多東遍朝鮮西

絕域香蘭醉草盡蒐羅

筆誇老健欲凌雲風雅扶輪屬太君分得瓣香

欣下拜紗幮不隔侍宣文

李室會稽鍾素澹心

名山千古在雅事一時傳錦字騰輝處應聯寶婺

躔

辛卯孟春臥園兄自梁園返署以方伯麟

太夫人所選正始集相示愚姊妹拙作並

蒙采錄賦此郵寄呈謝



羅田潘煥榮 仲華

鍾郝風儀樹典型 憐才博訪眼垂青 俚詞也入珊  
瑚網却勝名登千佛經

畫荻丸熊願已償 白頭又為選詩忙 衙齋遙隔宣  
文帳問字無由侍講堂

羅田潘煥吉 幼暉

艷體歸裁別堪為 女史箴閨中操玉尺 繡外度金

針正始扶詩教仁慈抱佛心 太夫人喜 製藥施濟 未能親講

席感佩託微吟

潘歸安楊清材 琴珊

起居八座太夫人 愛采詩篇似采珍 集腋應知非  
一日獨能搜訪到邊垠

大秤天付與量才 濃淡都教入選來 恰似春風能  
及物萬花如錦一齊開

周陽湖徐蒨

與君共鄉里相尙未相知 新集傳今日芳名說舊  
時因緣結文字典雅繼風詩幸遂登龍願迢迢繫  
我思



趙桐鄉陸費湘于 李齋

選樓高建鬱森森次第頻剛鄭衛音才入網羅賢  
相意法兼筆削史官心千絲織就機中錦一曲彈  
餘爨下琴西被流沙東訖海香山何止播雞林  
插架盈箱似鄴侯甌香家世本清流詩分今古胸  
中貯筆擅生枯腕底收造鳳體能成一代登龍名  
亦附千秋遠搜題咏謀剗劖寬大都如白傅裘  
詩解三乘別有腸平生結習未能忘點頭人坐談  
經石慧眼天開選佛場色相俱空懸寶鏡源流欲

溯泛慈航講壇自結蓮池社衣鉢都教詣上方  
愧我荒蕪等畫脂損功費日欲何之鶉衣敢辱量  
才尺烏篆難鐫沒字碑淡泊久同韋應物姓名合  
喚魏無知蘭閨坐擁文宣帳願列門牆侍母師  
壬辰夏兒子燦中州書來云 完顏太夫人  
選閨秀詩為正始集輯入余作刻成即以  
見貽仰止已深感謝復集寄詩代書

伍荆溪黃蘭雪 香冰

詩僊飛下蓬萊闕天與文閨開闕閱珊瑚絳樹發



奇葩猶帶烟霞古僊骨春幃畫永北堂深收拾瑤  
華寄逸情靈奇翕習吐光恠一代名媛啟正聲關  
雎四始非憑臆篇內多傳陰教德可知風化起閨  
中不獨詞章播京國詞章早擅刺繡餘瑯環深閱  
菑房居偶拈新韻題新句座上名香案上書扶風  
淑訓彭城則別有高懷到毫末賦手能同左女才  
選樓欲奪蕭王席 國朝正始增迺上一時大雅  
推宗匠芳徽久仰謝家型母儀文采皆傾向華雲  
迢遞渾河闊兩地悠悠隔南北青編千里屬飛鴻

愧我當年綠牕筆我家罨畫溪之濱銅峯峩峩溪  
水深溪雲山月隔幽夢祗憑文翰來相親力祛浮  
藻歸平澹四十餘年老鉛槧非綠文字博虛名聊  
借搜羅託元覽承君雅意感君真自寫烏絲遠寄  
君卽今海內流傳日處處承平雅頌音

潘室 吳縣陸韻梅 琇卿

一編冰雪想襟期不數風雲月露詞多少清才量  
玉尺絳紗應拜女宗師

刻燭聯吟憶昔年香風吹到玉梅邊閨中不少同



心侶回首天涯倍黯然 汪小韞吳香輪陳靈簫諸女史俱舊時吟侶近作皆選入集中

麝月金星序玉臺微吟擁髻自低徊新詩補入然

脂集咏絮真慚道韞才 拙作蒙選入集中

甌香妙筆傳家法點綴名花異俗姿廿四番風憑

管領詩中有畫畫中詩 時求法書

潘室 吳縣汪紉蘭 佩之

幾載勤搜輯蘭閨起選樓品評歸月旦才筆擅風

流字字回文錦斑斑集翠裘玉臺應遜此韻事足

千秋

珍浦太師母夫人所選正始集鑑列之精取

材之博持論之高體裁之正為白來閨閣

所未曾有小詩亦蒙采人不勝榮幸謹撰

七古書於卷末

吳室 吳縣蔣徽 琴香

三百篇首傳關雎南國女子皆能詩鵲巢麟趾厚

風俗不以雕繪矜浮詞後來閨閣增佳什織錦迴

文推第一黃崇嘏高及第名朱淑真留斷腸集才

德能兼古亦稀曹大家及徐賢妃請聽中聲協琴



瑟從知雅化本宮闈詩教  
熙朝邁前古風雅頌咸稱得所天上遙聞詔獲音  
人間都按霓裳譜紅香僊館啟蘭陵壇坵金閨久  
服膺千篇麗句收吟篋六法餘波補畫徵偽體別  
裁追正始繁聲一洗箏琶耳博取清新俊逸才妙  
歸敦厚溫柔旨間氣乾坤有特鍾大篇往往出沉  
雄曾擅文章兼武略况持奇節表孤忠此編一出  
人爭誦碧海長鯨丹穴鳳翰墨全家感並收姓名  
許附千秋重安輿迎養有名臣慈蔭甘棠萬樹春

我本再傳詩弟子莫嗤小婢學夫人

陳  
室 錢塘武 懿 鐵君

正始名傳繼二南聖賢學問大乘談天花散雨人  
間滿萬古娜嬛一寶函

風範何須說謝庭一門詩畫更傳經非常人建非  
常事尤勝蛾眉拜阮亭

葉  
室 山陰何若瓊 閩霞

燕脂北地黛南都盡揀精鏤入冶鑪自是扶輪歸  
大雅紫蘭仙院總羣姝



六義端嚴偽體裁  
睢麟雅化溯胚胎  
金支華始唐山曲  
原自清思耿耿來

扶風系本出名賢  
作儷高門族望先  
天意獨隆紗幔福  
起居八座拜

恩偏

銘椒頌菊各千秋  
全擷芳華入選樓  
比似珊瑚開鐵網  
明珠不用惜潛投

獨以懷清勵蘖茶  
寒閨人盡慰菰蘆  
慈雲直似陽和被  
黍律能歛萬彙蘇

畫荻彤闈善教忠  
河平獨奏灑沈功  
齊賢令子榮當代  
絕勝高涼錦繡隆

德象溫恭拜女師  
蘋蘩禮教藉維持  
金箱珍重三千牘  
都是人間黃絹詞

學詠新詩愧道鹽  
全家均荷採雕奩  
人天稽首華嚴界  
惟有心香一瓣拈







正女集 後序  
鬚眉豪氣抑豈房幃雅韻無關朝野芳徽其閒壽  
母令妻貞娥孝女以及禪參紺宇輟改青樓亦莫  
不殫精竭思嘔心咳血發其鬱結播諸詠歌乃未  
幾而帙散糊窗又未幾而藁殘覆甕字餘蠹蝕卷  
牘鼠傷漸滅之速感慨所同此

完顏暉太夫人所以有正始集之選也且夫詩之  
爲教正已以正人者也而周南以關雎始召南以  
鵲巢始論推暨則化始宮掖論嫺習則德始窈窕  
太夫人豫藩事翁甌郡相內長君陳臬喜動平反

季嗣分曹憂增薄遺猶憶甌香舊業結習難忘並  
念閨秀多才流傳無自遠者缺有閒近者豈無徵  
溯開國以逮同時由中華以推外域搜羅殆遍甄  
別始嚴詞黜雙文品崇寡鵠哀成鉅集錫以宏題  
正莫甚焉始基之矣黛學繡吳趨備勝甬渡侍家  
主而吮豪粗諳點畫隨嗣君以審韻謬解伊唔雖  
月夕風晨擬比簪裾角咏而釵荆裙布愧援翟弗  
通辭命薄如儂沉淪奚惜才高幾輩憑弔誰憐茲  
接瑣言備知盛舉絮吟喜有成編椒頌幸無遺稿



正始集 卷一  
凡居巾幗共荷陶甄既許標題敢辭謏陋率呈駢  
語謹附尾端唯是分隔雲泥空勞蝶夢費遲棗栗  
未問魚軒實戀戀於文字因緣彌拳拳於正始風  
教云爾金閨女史歸江夏郡石黛卿敬序

跋語

右正始集二十卷附錄一卷補遺一卷共得詩  
千七百餘首計九百三十三人  
君姑太夫人所手訂也  
太夫人幼年針黹精妙爲儕輩所推服稍長承  
外王父芝堂公指授博通經籍兼善詩畫以故族  
黨間有三絕之稱乾隆戊申來歸我

先舅大人逮事

曾王母先意承志深得



大父母歡心及生吾夫子兄弟三人出就外傳猶  
時時親督課之嘉慶己巳夫子年十九聯捷成進  
士  
太夫人喜勗以詩有功名雖并春風發心性須如  
秋水平之句已而授職中書又繪紫薇夜月便面  
以賜題曰捷報泥金青錢入選薇省深沉鳳池清  
淺夙夜勿怠匪躬蹇蹇叨列清班置身通顯夫子  
敬承 慈訓故歷官皆報最道光癸未出守新安  
太夫人就養官舍發願濟人乃詳攷古今仙傳良

方手錄成帙名曰鶴背青囊依法合藥務以博施  
爲懷頃歲既校定關中李二曲先生集毘陵惲遜  
庵先生語錄及憨山大師觀楞伽記重刊行世丙  
戌冬復檢舊篋所存名媛詩命夫子兄弟廣爲蒐  
輯親加選定凡三歷寒暑始得成書而猶恐去取  
之未當也以稿本就正於閩秀諸大家然後授梓  
繼又慮詞藻之偏尙也暇日檢閱廿三史一統志  
八旗通志各一過擇列女之卓行可傳者分類編  
次爲蘭閨寶錄一書將與是編同壽梨棗蓋揚班



左之才華與示郝鍾之禮法意有並重所以垂教於閨門者至深且遠矣

道光十有一年歲在重光單閏長媳程孟梅謹跋

沐省龍文齋刷印裝訂成部



